

ŊWE unó Jisɔs aléré Jɔn né amɛ gejya

Jɔn agaré unó bi úlú né ηwe yina

¹ Né mmu ηwe yina ne ásamé unó bi Jisɔs Kras aléré. Ɛsɔwɔ aɓye Jisɔs akaá unó bina nnó aléré baá défwɛ bií unó bi uchwɔ pyɛ nana. Jisɔs Kras ató ekiénné wuú nnó ejye eɓye maá utó wuú Jɔn akaá unó bina. ² Ne Jɔn agaré unó bina uko wye ndere ji agené. Genó eyigé ji asamé élé meko mejó ayi Ɛsɔwɔ ajó ne wáwálé ayi Jisɔs Kras aléré né genó eyi ji agare. ³ Ɛsɔwɔ ájé muú ayi akuú ηwe yina ayi agaregɛ unó bi upyéé mbɔ nana ne ebi upye nye meso gébé, ne ájé ntó yéndémuú ayi awúu unó bi ásamé wye ne aɓyéé ubi. Néndé gébé eyigé unó bi upyéé nye géla kwókwólé.

Jɔn alɔ matame mbaá machomele bóó Ɛsɔwɔ ákénéama

⁴ Me Jɔn ne nsamé ηwe ayina ntɔme eta nyú machomele bóó Ɛsɔwɔ akénéama ayi álú né gebagé mewaá Ɛsya.

Nnɛnemmye nnó Ɛsɔwɔ áléregé enyú galógáló, áɓye enyú débé né nesɔ. Ɛsɔwɔ muú alu nana, muú abɔ alu me, ne muú achwóó nye ne mandoó ake-neama ayi álú né mbɛ geluɔge gefwage jíí chóncho ne * ⁵ Jisɔs Kras, muú álú tɔjese ntésé ne maá mbɛ ayi akwilé né negbo, ne muú alú nana, mfwa kpaá mbaá afwa mme, áléregé enyú galógáló, aɓye enyú

* **1:4** Elú wáwálé nnó: Ɛsya ayi ajógé mbɔ élé ayi te nya. Fina ákuú nnó Turkey.

débe né nesɔ. Matame mabe ne ji muú abɔ́ wye gejeé ne esé ne aferé esé né gabo gétúgɛ manoo míí ami machyɛ́ mme. ⁶ Ne apye esé déla bɔ́ abi ágbárege gefwa ne ji ne apye ntó ese déla ampyé́e ure abi ápyé́e utɔ́ Nte wuú Esɔwɔ. Ngó ne utó úbé ne ji te kwyakwya ne kwyakwya. Amen

⁷ Gége, ji achwɔ́ nye né mmu gekógɛ mfaánebuú ne yéndémuú agene nye ji. Yé ébélé bɔ́ abi ájomé ji áwané. Ne bɔ́ mme meko álili nye gétúgɛ efwyale ewé ji achyegɛ nye ebwɔ́ ébé mbɔ. Amen.

⁸ Ata Esɔwɔ aké, “Me ne nlú muú mbe ne ayi kwyákwyá.” Me ne alú, “Muú ayi alú nana, ne ayi abó alú ne ayi achwɔ́ nye. Esɔwɔ ayi Apwɔ́ amu.”

Jɔn agé Mad Nte Mekwad né amɛ géjyá

⁹ Me Jɔn, menmɛ nyú né echomelé bɔ́ Jisɔs, gétúgɛ me ntó nchome mmye ne Jisɔs, ne ngene ntó efwyale wye ndere enyú. Me nlú ntó muú ama wye ndere enyú né gefwa eyigé Esɔwɔ ágbárege ne nkógɛ metɔ́ wye ndere enyú mpwa fɔ́. Abó ábú me mfé né melo metɔ́ nnyi ewé ákuú nnó Patmɔs gétúgɛ ngárege mekomejɔ́ Esɔwɔ ne wáwálé ayi Jisɔs aleré né genó eyi ji agaré. ¹⁰ Né bíí uwyaá ebi ulú bíí Ata, Mendoó Ukpea echwɔ́ me mmye ne nwú gekpékpégɛ meko fɔ́ ndere atané me né meso eké meko mbá. ¹¹ Aké, “Sá unó uko ebi ɔ́gené nye né mmu nwe, ɔ́tɔ́ mbaá machomele bɔ́ Esɔwɔ akénéama ayi álú né umé malɔ́ yina: Efesɔs, Smyrna, Pɛgamɔn, Tayatira, Sadis, Filadelfya ne Laodisha.”

¹² Ne mbwólégɛ mmye mangé muú ayi ajóge me mejɔ́ né meso, ngé ulú mátúlékáj ukénéama ebi akwye ne gul. ¹³ Né metɔ́ metɔ́ ulú ebimbɔ, ngé

muú fə ndere atené eké maá nte mekwaá. Afyé nku metyémetyé ayi akwóné ji uka. Ne ani gebagé ndeé eyi gégénege eké gul, génə ji né gebómé.

¹⁴ Mejwye wuú elú pópó eké néwúné ugoó, yé eké makaḅkoma ne ame jií agénege eké nénómé mewε. ¹⁵ Uka bií ushwánege eké afyaáko ayi ásoó né mewε, atilé ashwánege manémané. Meko wuú awyale eké nekóné nnyi nekwene mbə, chuchu. ¹⁶ Agbaré ambe akénéama né εgbε εbwənyε wuú ne aparanja ayi achyaá magbε apea atané ji né meno. Ushu bií ugenege eké ημεέ metó ηwəmesé.

¹⁷ Ngege ji, nkwe ji né uka eké muú ayi agboó. Anyaá εbwənyε wuú anere me mmyε aké, “Ōfoge, me ne nlú muú mbε ne ayi kwyakwya. ¹⁸ Me nlú mebe, me mbə ngbo, ne γε menlú mebe te kwyakwya ne kwyakwya. Me nwyaá uto mampye bəó abi ágboó ákeré né geḅwá wyε ndere muú ágbaraḅge bə agbóḅlól manené melə áwuú bəó.

¹⁹ “Sá yé unó bi wə əgené; εbi upye mbə nana choncho ne εbi upyé nyε meso gebé. ²⁰ Ge genó eyi gebə gelu bibíí, eyi getome ne ambe akénéama ayi əgene me ngbare né εbwənyε wa ne uluə matúlékáḅ ukénéama εbi akwyéé ne gul. Ambe yimbə akénéama atene mbaá makiénné εsəwə akénéama ayi alú né machomele bəó εsəwə akénéama. Ne uluə matúlékáḅ εbimbə ukénéama utene mbaá machomele bəó εsəwə akénéama.”

2

Nwe yi átəme mbaá εchomele bəó εsəwə né melə EfεsəS

¹ Muú ayi me ngene né ama gejya aké, “Sá ηwe yina ɔ́tɔ mbaá ekiénné Ɛsɔwɔ ɛwé ɛchomele bɔ́ɔ Ɛsɔwɔ né melɔ Ɛfesɔs.

“Garé ɛbwɔ́ ɔ́ké, gegé mekomejɔ́ɔ ɛyi ɛtane mbaá muú ayi agbaré ambe akénéama né ɛbwɔ́nyɛ wuú ne akene né metɔ́ metɔ́ ulú mátúlékán ukenéama ɛbi akwyɛé ne gul. * ² Me nkaá unó uko ɛbi ɛnyú dépyéé, mengé utɔ́ bi ɛnyú depyɛ ne ɛshyɛ ne metɔ́ ɛwé dékogé délá dépwáá, nkaá nnó ɛnyú dékií fɔ́ bɔ́ɔ abo, ne ɛnyú démua bɔ́ɔ abi áké álú ángbá Jisɔs, dégé nnó ápɔ́, álú bɔ́ɔ gebyó. ³ Ɛnyú dekége mataɔ́, ne dégéne ɛfwyale né gétú ya, dépwáá fɔ́. ⁴ Yémbɔ́ gége genó ɛyigé nshulege ɛnyú ndo wyɛ na. Ɛnyú débɔ́ɔ sé gejeé ne me ndere depyɛé mbembe wɔ́. ⁵ Ferege dégé mati ayi ɛnyú depyɛé gyɛé. Dékwórɛ mataɔ́ nyú dépyɛé gé unó bi ɛnyú debɔ́ mbe depyɛé mɛ. Dela depyɛ mbɔ́ wɔ́, me nchwɔ́ fere nyɛ gelúgɛ étúlékán nyú né gelúge machomele bɔ́ɔ Jisɔs. ⁶ Yémbɔ́, gége genó gelógélɔ́ ɛyigé ɛnyú depyɛ na, ɛnyú dekií fɔ́ ubóbɔ́ unó bi bɔ́ɔ ɛkwɔ́ Nikolatan ápyɛ wyɛ ndere me nla nkií.

⁷ “Muú ayi awya matu awú genó ɛyigé Mendoó Ukpea ɛjɔ́ge mbaá machomele bɔ́ɔ Jisɔs.

“Ne yéndémuú ayi ammyɛ kpaá apwɔ́ɔ gabo, me nchyege nyɛ ji ɛbwɔ́nyɛ nnó anyé umpome genɔ́ ɛyi gechyɛge geɲwá ɛyi gélágé byé. Genɔ́ ɛyimɔ́ gewene né melɔ Ɛsɔwɔ.”

ηwe yi átɔme mbaá ɛchomele bɔ́ɔ Ɛsɔwɔ né melɔ Simina

* **2:1** Ɛlú wáwálé nnó: Né mmu ηwe Ɛsɔwɔ ayi meke unó bi ji abií ɛlé wáwálé ayi ji ajyaá manlere bɔ́ɔ bií.

⁸ Ama ajó aké, “Sa ηwe ayina otó mbaá ekiénné Eσωω εwé echomele bóó Eσωω né meló Simina.

“Garé ebwó oké, gége mekomejóó eyi etane mbaá muú ayi álú ula ulóó ne kwyakwya, ji ayi abo agboó ne akwilé né negboó. ⁹ Me nkaá efwyale ewé enyú degéne ne gekpo eyi enyú délú yémbó enyú dewyaá gefwa. Nkaá ndere bóó áchóó enyú mabó. Ebwó ájógé ake alú bóó Jus ne ápó, álú lé bóó danchómeló. ¹⁰ Ngarége enyú nnó défógé fó efwyale ewé enyú déchwóó dége, danchómeló apyéé nye áfyé enyú abifó né denó, nnó ammua age ufóó bóó abi enyú delú ne degene nye efwyale né ndó efya. Fyge wye matóó ne me yé ebé elé negbo ne enyú degbóó. Ne me nchyege nye enyú nsa ayi alu genwá eyi gélagé byé.

¹¹ “Muú ayi awyaá matu awú genó eyigé Mendóó Ukpea ejógé né machomele bóó Eσωω.

“Ne yéndémuú ayi ammye apwóó gabo, agboó fó negboné ndó epea.”

Nwe yi átome mbaá echomele bóó Eσωω né meló Pégamón

¹² Ama ajó aké, “Sa ηwe ayina otó mbaá ekiénné Eσωω εwé echomele bóó Eσωω né meló Pégamón.

“Gare ebwó oké, gége meko mejóó ayi atane mbaá muú ayi awyaá aparanja yimbó ayi achyaá magbe ápeá. ¹³ Me nkaá nnó enyú dejwólege né mbaá ayi danchómeló muú álú mfwa ájwólege, yémbó dénógé wye mabó ma ne déshá fó mankamé depóré etiré détomé ne me, yé gébégé áwáne Antipas né geluage nyú, ji muú agaré mekomejóó wa wáwálé kpaá te ji agbóó. ¹⁴ Yémbó gé unó bi me nshulegé enyú ndo wye na; bóó fó alú né geluage

nyú abi akwɔlegé unó bi Balam aléré. Ji aléré Balak ndere ápye ne ate bɔ́ Isrɛli ápyée gabo. Apye ebwɔ anyée menyée upɛ ayi áchye mbaá aló uka, ne apye ntó ebwɔ ánane manane tametame. ¹⁵ Ne bɔ́ abifɔ ntó álú né geluagé enyú abi akwɔlegé unó bi bɔ́ ekwɔ Nikolatan álerégé. ¹⁶ Kwórege matɔ́ nyú, délyaa gabo, délá dépyée mbɔ wɔ́, me nchwɔ́ wáwá mamye umye ne bɔ́ bimbɔ ne aparanja yimbɔ ayi atanégé me meno.

¹⁷ “Muú ayi awyaá matu, awú genó eyi Mendoó Ukpea ejógé né machomele bɔ́ Eɔwɔ́.

“Muú ayi ammye kpaá apwɔ́ gabo, me nchyege ji menyée mfaánebuú ayi ábelé bíbí. Me nchyege ji ntó ntaá eniné pópó ne mabo make ami asamé mfaá néní. Ne yée muú ayi akágé mabo ami bɔ́ apɔ́, ekose muú ayi asele ntaá eníné mbɔ ne akaáge.”

Nwe yi átame mbaá echomele bɔ́ Eɔwɔ́ né melɔ́ Tayatira

¹⁸ Ama ajó aké, “Sa nwe yina ɔ́to mbaá ekiénné Eɔwɔ́ ewé echomele bɔ́ Eɔwɔ́ né melɔ́ Tayatira.

“Garé ebwɔ́ oké, gege mekomejɔ́ ayi atane mbaá Maá Eɔwɔ́, muú amɛ ji agenege eké nenɔme mewɛ ne uka bíí ushwanegɛ eké afyaá ako ayi atilé agenege mané mané. ¹⁹ Me nkaá unó bi enyú dépyée, nkaá gejeé eyigé enyú debɔ́ ne me, ne metɔ́ ewé enyú défyɛ ne me. Nkaá ndere enyú dépoógé atɛ ne ndere dékoógé matɔ́ déla dépwá fɔ́. Nkaá nnó unó bi enyú dépyée nana upwɔ́ ebi enyú debɔ́ dépyée mbembe gébégé défyée matɔ́ ne me fyée. ²⁰ Yémbɔ, gege genó eyigé me nshulege enyú ndo wyɛ na: Enyú délyaá Jɛsɛbel, maá mendée ayi abyɔge gebyɔ́ nnó ji alú muú ekpávɛ Eɔwɔ́,

abwólé bọ́ utọ́ ba né unó bi ji alerege, ánane manané tametame ne anyé menyéé upẹ ayi áchyé mbaá aló uka. ²¹ Me nchye ji gébé nnó akwọré metọ́ wuú, alyáá eno ewé ji anyéé yémbọ́ ashya manlyáá. ²² Gétú eyigémbọ́ me mpyéé nyẹ ji akwe nemeé, ne bọ́ abi ábélege ne ji mpyéé nyẹ ebwọ́ agé efwyale dọ́ mbọ́gé alá ákwọré matọ́ bwọ́ ályáá gabo ayi ebwọ́ ápyéé wó. ²³ Ne me nwáne nyẹ bọ́ abi ákwọ́lege unó bi ji alerege, ne bọ́ echomele Jisọs ako ákage nyẹ nnó me ne nlú muú ayi akágé depọ́ etire délú akwaá né matọ́ ne ufere ebi ebwọ́ áferege. Ne ndere muú apyẹ gabo, mbọ́ntó ne nchyege ji efwyale.

²⁴ “Yémbọ́ enyú ako abi délú né melọ́ Tayatira abi déla kwọ́lege unó uboubo bina ebi bọ́ abifọ́ akuú nnó anọ́ unó danchọ́meló, mpọ́ sé ne metuú ewé cha ewé nnegege enyú mekpọ, ²⁵ ekosé mangaré enyú nnó dégbare unó bi défyéé metọ́ wyéé chánchá kpaá tẹ me nchwọ́. ²⁶ Ne muú ayi ammyẹ apwọ́ gabo, ne apyéé utọ́ ba ndere nkélege kpaá tẹ kwyakwya nchyege ji uto nnó abẹ mfwa mbaá malọ́ mme mako. ²⁷ Ne ágbarege nyẹ ebwọ́ ne amu matomato wyẹ ndere Ntẹ wa áchyéé me utó, ne áchọ́gerege nyẹ ebwọ́ ubauba eké unje meséé. ²⁸ Ne nchyege nyẹ ji membe ayi agenege né gejejege bíí.

²⁹ “Muú ayi awyaá matu, awú genó eyigé Mendọ́ Ukpea ejọ́gé mbaá machomele bọ́ Eṣọ́wọ́.”

3

Nyẹ yi átọ́me mbaá echomele bọ́ Eṣọ́wọ́ né melọ́ Sadis

¹ Ama ajó aké, “Sa ηwe yina oto mbaá ekiénné Esowó ewé echomele bóó Esowó né meló Sadis.

“Garé ebwó oke, gēge mekomejóó ayi atane mbaá muú ayi abóó mandoó akénéama ayi ápyéé utóó Esowó ne ambe akénéama, nkaá unó bi enyú dépyéé. Bóó ágégé enyú áké délú abe sanji degbo.

² Kwilege téné, défyε eshyε mampyεge unó bi enyú déle délyaá mampyεge nnó ékágé dékpe délyaá kan̄ka, nénde nge nnó utóó nyú úlú dantene cho né mbe ushu Esowó. ³ Tεge yé unó bi alere enyú ne ndere déwuú, kworege matóó nyú dekwolege unó bimbo chánéné. Mbogé dékwilé tené wó, nchwóó nyε eta nyú eké menjo né gébé eyigé enyú délá kaágé. ⁴ Yémbó ukeke bóó abifo alú né geluage nyú né meló Sadis abi alá ágilé fó mawule ebwó wó, mmyeke áchó fó menyammyε ebwó ne gabo wó. Ebwó afyéé nyε mandée pópó akene ne me nénde ákwane mambe bóó ba. ⁵ Ne muú ayi ammyε kpaá ápwóó gabo, áfyéé nyε ji mandée pópó eke ebwó. Ne me mferege fó mabó ebwó né mmu ηwe ayi asamé mabó bóó abi awyaá genwá eyi gélagé byé. Ne me ngarége nyε gbogbonó né mbe ushu Nte wa ne makiénné jíí ntó nnó, ji alú muú wa.

⁶ “Muú ayi awyaá matu awú genó eyi Mendoó Ukpea ejóge mbaá machomele bóó Esowó.”

Nwe yi átame mbaá echomele bóó Esowó né meló Filadelfya

⁷ Ama ajó aké, “Sa ηwe yina oto mbaá ekiénné Esowó ewé echomele bóó Esowó né meló Filadelfya.

“Garé ebwó oké, gégé mekomejóó ayi atane mbaá muú ukpea ayi muú akage neré metóó ne ji. Ji ne ágbaré agbógóló mfwa Devid ayi achyεge ji uto

mamgbaré gefwa ndere mfwa Devid. Ne ánénege menombi yé muú ayi akáge gbε εwú apó, agbεge ntó menombi yé muú ayi akáge nené εwú apó. *

⁸ Me nkáge unó bi enyú dépyé. Gege me nne mbó enyú menombí ne yé muú ayi ákagé gbε εwú apó. Nkaá nnó enyú dépó fó né εshye, yémbó enyú dékwólege wyε unó bi me nlere délú danshyá nnó dékaágé fó me. ⁹ Wúgé! Bóó danchómeló abi ábyóge gebyó nnó álú bóó Jus ne apó, mpye nye εbwó ato mano né mbε ushu nyú, ne ákaá nnó me mbó gejeé ne enyú. ¹⁰ Enyú dékwólege wyε unó bi ngaré enyú nnó dékoge metóó gétú eyigémbó, mento mpye nye nnó enyú dékpegé fó ne εfwyale εwé εchwóó nye né mme meko. Éfwyale εwémbó elú elé mamua bóó mme meko. ¹¹ Ela gachyéé me nchwóó, gbarege unó bi défyéé metóó wyéé cháñéné nnó ekágé muú fó afóó nsa nyú. ¹² Muú ayi ammye apwóó gabo, mempyéé nye ji álá eké gekwa eyi muú álá akágé nyíí né mmu εcha ure Éswó wa. Ne alyagé fó geji te kwyakwya. Nsamé nye mabó Éswó né menyammye wuú ne amí meló Éswó wa. Meló εwémbó elé meló Jerosale ayi meke ayi atane mfaánebuú mbaá Éswó ashulé fa mme. Ne nsamé nye ntó mabó ma ami make né menyammye wuú. ¹³ Muú ayi awyaá matu awú genó eyi Mendoó Ukpea εjógé mbaá machomele bóó Éswó.”

Nwe yi átame mbaá εchomele bóó Éswó né meló Laodisha

* **3:7** Elú wáwálé nnó: Agbógóló Devid elé meti εwé bóó ako abo makpe né gefwagé Éswó.

14 Ama ajóó aké, “Sá ηwe yina otó mbaá ekiénné Εσωω εwé echomele bóó Εσωω né melo Laodisha.

“Gáré εbwó oké, gége mekomejóó eyi etané mbaá muú ayi ákuú ji Amén, muú ayi muú ákage néré metóó ne ji ne ntésé ayi apyéé bóó ákage wáwálé ayi atomé ne Εσωω. Ji alu muú ayi te ula ulóó, unó bi Εσωω akwyéé ukene ne ji. 15 Me nkaá unó bi enyú dépyéé. Nkaá nnó enyú dékwéné fó nyuanyua ne désóó fó ntó dugédúgé, me mbo nkélege εbe nnó dékwene nyuanyua yé nnó désóó dugédúgé. 16 Ne elé enyú délú jwale makwe nyuanyua dékwene mansóó ntó dugé dúgé désóó, gétú eyigémbó, mpame nye enyú ne dafyéé nkane muú akpóo matyéé. 17 Enyú déké déwyaá gefwa, délú gbene ne dékelege se yé genóge fó. Enyú dékaá mbo fó nnó délú mbyambya, meshwemeshwe, gek-pogekpo, ame nónómé ne gejogéné wó. 18 Ndere elúmbó me nchyege enyú majyéé nnó déchwóó déna gul eta wa ayi ásóó né mewε, álá ápó ne deba, nnó apyé enyú débε ne gefwa. Ne naáge ntó mandeé pópó nnó dékwere gejogéné nyú eyi gegboó mmyε. Naáge ntó uka εbi défyéé ne ame nnó dégene mbaá. 19 Bóó abi me ngboó ne εbwó, apyége gyéé, nshulege εbwó ndo, nlerenge εbwó chuchu. Gétú eyigémbó, kpáge gechyéé dékworege matóó nyú délúyáá gabo. 20 Wúgé, me ntene mbo né menombi nyú ndoó nnó dénene me gepú, muú awúgé meko wa, anenege me menombi nnó nkpe mmu, nkpe ne mbane ji denyé menyéé ulua. 21 Ne muú ayi ammyéé apwóó gabo, me nchyege nye ji εbwónyε nnó ajwóle ne me né geluage gefwa ya, wyε ndere me ntó mmyε mpwó bóó mawáme ba njwólé ne Nte wa né geluage gefwa jíí.

22 “Muú ayi awyaá matu awú genó eyigé Men-
doó Ukpea ejǵgé mbaá machomele bǵó Ešǵwǵ.”

4

*Jøn age amε geiya nkane Ešǵwǵ ajwǵle né mfaá
geluǵge gefwa jii*

1 Unó bina upyεge mbǵ, mma nge amε geiya. Nke mpele nge menombi fuú né mfaánebuú. Ne meko muú ayi me mbǵǵ mbe nwuú eké meko mbá, ama ajǵǵ ne me aké, “Kwǵ chwǵ wena, me nɓere wǵ unó bi upyεé nye meso gébé.” 2 Ténéténé yimbǵ Mendoó Ukpea echwǵ me mmyε, ékpá me mfe ne mfaánebuú. Nke mpele, nge geluǵge gefwa ne muú fǵ ndere ajwǵlé né mfaá geji. 3 Ne muú ayi ajwǵlé né mfaá geluǵ eyigémbǵ ashwane manémané eké ntaáne ŋka eniné ákuú jaspera ne carnelian. Ne mbya meshu ewe etane enǵǵ geluǵgé eyigé mbǵ ne mme elú nshyε nhsyε eké mataá ayi ákuú nnó éméral. 4 Nge ntó uluǵ gefwa ebifǵ esaá meso eni ndere unǵǵ geluǵ eyigémbǵ né mme. Ne ákpakpa fǵ esaá meso eni, abi afyεé mandeé pǵpǵ, ákwere délaré gefwa né makpo ebwǵ etire ákwyεé ne gul ájwǵlé mfaá ubi. 5 Né geluǵ eyigémbǵ, gasama akéle, mamamama, mamfeé ányane, mbaá áwyaale. Né mbe geluǵ eyigémbǵ ntó, matúlékán akénéama ágεnege. Ne matúlékán ayimbǵ akénéama, atene mbaá mandoó akénéama ayi apyεé utǵǵ Ešǵwǵ. 6 Né mbe geluǵ eyigémbǵ ntó, nge genó gefǵ eké ebéé mega.

Gelu eféé eféé, ne ŋanéŋané eké makanǵkomma. Nge ntó ufǵǵ menya uni eyi elú mbeε. Etené enǵ geluǵ eyigémbǵ né mme. Menyammyε ebwǵ mekomeko

álu ne amε mβε ne ayi meso. ⁷ Né geluage menya yimbɔ eni, ayi mβε alú eké genyanya, ayi agbeé εpea alú eké maá menɔ mpɔ, ayi agbeé εléé awyaá ushu eké mekwaá, ne ayi agbeé eni ntó alú eké nenyá eniné nélyεnege. ⁸ Né geluage menya yina eni, yé ayi ndé awyaá ubagele ukéné ne gejamégé amε né mmyε, ne amε ayifɔ ntó ne nteé ubagele bíí. Ne menya yina ekwane makwa utuú ne ηwɔmese εpwaá. Ekwane eké, “Εσωω ukpea, Εσωω ukpea, Εσωω ukpea, alú Ata Εσωω Muú Apwɔɔ amu. Ji abɔ alú mε, alu nana ne achwɔɔ nyε.”

⁹ Εchyεge ηγɔ, ενόγέ ne matame mbaá muú ayi ajwɔlé mfaá geluage gefwa, ji ayi alú meβε te kwyakwya. ¹⁰ Akpakpa bimbɔ esaá meso eni ákwe uwya mme né mβε ushu muú ayi ajwɔlé né mfaá geluage gefwa εyigémbɔ, ánóγέ ji muú ayi alú meβε te kwyakwya ne kwyakwya, ¹¹ aké, “Ata εsé Εσωω, ωɔ ɔkwané mansε ηγɔ, ενόγέ ne uto. Néndé ωɔ ne ɔkwyε unó uko ndere ejjí ωɔ né metɔɔ ne ɔkwyéé ubi ne ɔpyéé ubi úlú.”

5

Gebagé ηwe εyi ápwiré pwiré ne mad εγóηme

¹ Genó εyigé fɔ εyigé me ngené élé gebagé ηwe εyi ápwirépwiré né εbwɔnyε muú ayi ajwɔlé né geluógé gefwa. Né gebagé ηwe yimbɔ, ásá unó wyε mβε ne meso ne ádyε geɣi ne emá né malu ákénéama. ² Ne nge ekiénné Εσωω εwé εwyaá ncha, εgige kénké eké, “Waá akwané mambea emá εwé ádyεé né gebagé ηwe yimbɔ anéné geɣi?” ³ Yε muú fɔ apó yé né mfaánebuú, fa mme yé né malɔ áwuú bɔ ayi ákaáge néne gebagé ηwe yimbɔ akuú

genó eyi gélú mmu. ⁴ Ne nɔ manli segé segé néndé yé muú fɔ apó ayi ákwané manené gebagé ηwe yimbɔ akuú genó eyi gélú mmu. ⁵ Ne muú ama né geluágé ákpakpa bimbɔ aké ne me, “Oligé sé, gé, muu ayi ákuú ji genyanyagé ntoóné Juda, ji alú ntó mpyáne mfwa Devid ammye apwó bɔ́ mawámé bíí. Gétú eyigémbɔ, ji ne akaáge bea emá ewémbɔ malu akénéama ne anéné gebagé ηwe yimbɔ.” *

⁶ Ajɔ́gé mbɔ, ngé maá egɔηme áténé kwókwólé ne geluógé gefwa eyigémbɔ, alú eké ábó áwá me ji. Menya eyi elú mebe eni ne ákpakpa bimbɔ, áno ji mme. Ji awyaá ambya akénéama ne ame akénéama. Ame yimbɔ atené né mandoó akénéama ayi ápye utɔ́ Eɔwɔ. Ne Eɔwɔ ató áji né mme meko. ⁷ Ne maá egɔηme yimbɔ achwɔ se gebagé ηwe eyimbɔ ayi ápwirépwire ne ebwɔnye muú ayi ajwólé né mfaá geluógé gefwa. ⁸ Aségé mbɔ, menya yimbɔ eni ne ákpakpa bimbɔ esa meso eni ákwe uwya mme né mbe ushu wuú. Ne yéndémuú né geluagé ákpakpa bimbɔ ne menya yimbɔ áwyaá nenke né ebwɔ ne geku eyigé akwyéé ne gul. Yéndé gekú gegbeé ne unó bi unóme gebe gelógéló. Unó ube bina utené mbaá mmyemenene bɔ́ Eɔwɔ. ⁹ Ne ebwɔ ákwa ekwɔ meke ewé yé muú fɔ álá álú dan̄kwa aké, “Wɔ ɔkwané mansé gebagé ηwe eyi gepwiré ɔbea ema ewé ádyéé wyéé, néndé áwá wɔ, manoó mmye ami magbele mana gejamégé bɔ́ nnó abe bɔ́ Eɔwɔ. Bɔ́ bina atané né malɔ mme mako, ufɔ ufɔ́ bɔ́. Abi ájógé mejɔ́ ema ne abi ájógé mejɔ́ cháchá. ¹⁰ Ne ɔpye ebwɔ álú ekwɔ ampyéé upɛ né gefwa eyigé Eɔwɔ se

* **5:5** Elú wáwálé nnó: Nen̄ké elé genóge ákwelé ubée ne geji.

ágbárege. Ne ɛbwɔ ágbárege nyɛ gefwa fa mme.”

¹¹ Ne nké mmage pɛ, ngɛ ne nwu meko gejamégé makiénné Ɛsɔwɔ ayi yé muú alá ákágé pa ndere atene anɔ́ geluwagé gefwa, ne menya ɛyimbɔ eni ne ákpakpa bimbɔ. ¹² Ne makiénné yimbɔ ákálé kenké áké, “Maá ɛgɔ́ɛme ayi abɔ awáne ákwane mansɛ uto uko, ne gefwa, ne denɟa, ne ɛshyɛ, ne ɛnógé, ne ɛɟɔ ne matame.” ¹³ Ne nwu ntó unó uko ɛbi Ɛsɔwɔ akwyɛɛ, ɛbi úlú né mfaánebuú, ɛbi úlú fa mme, ɛbi úlú né malɔ aló ne ɛbi úlú mmu ɛbɛé mega ne unó uko ɛbi úlú yéndé mbaá, ukwane uké, “Matame, ɛnógé, ɛɟɔ ne uto uko ube ne muú ayi ajwɔlé mfaá geluwagé gefwage maá ɛgɔ́ɛme tɛ kwyakwya ne kwyakwya.” ¹⁴ Ukwage mbɔ, menya yimbɔ eni ɛkame ɛké, “Amɛn” ne ákpakpa bimbɔ ákwɛ uwya mme ánógé Ɛsɔwɔ ne maá ɛgɔ́ɛme.

6

Maá ɛgɔ́ɛme abea malu ɛma ayi mbɛ ákéné né ɛwɛ ayi ápwiré

¹ Ndere mpɛlé, ngɛ nkane Maá ɛgɔ́ɛme abea melu ɛma ɛwé mbɛ né geluwage malu akénéama ayi adyɛɛ né ɛwɛ yimbɔ. Ne nwu meko menya ama né geluage menya ɛyi mebe eni, ndere ajɔ́ ne meko kenké ɛké néfé aké, “Chwɔ we.” ² Mpege, ngɛ mpɔ mekagala pópó. Muú ayi ajwɔlé mfaá agbare embeé né ɛbwɔ ne áchyɛɛ ji ɛla gefwa ne akɛne aɟyɛ ndere muú ayi aɟyɛ mmyɛ mɛ ummyɛ apwɔ ne amage pwɔ nyɛ.

³ Ne ji ábeagé melu ɛma ɛwe ɛgbeé malu apea nwu meko menya ayi agbeé menya ɛpea ndere ajɔ́ aké, “Chwɔ we.” ⁴ Ajógé mbɔ, mpɔ mekagala

megile atane achwó. Ji achyẹ́ muú ayi ajwólé mfaá uto ne gekpekpẹ́gẹ́ apanjanja mamfere nesọ fa mme nnó bọ́ ámmyẹ́ge áwané atẹ.

⁵ Amá ábeagẹ́ melu ẹwé ẹgbeé malú alẹ́, nwu meko menya ayi agbeé menya ẹlẹ́, ndere ajọ́ aké, “Chwó we.” Mpege, nge mpọ́ mekagala megile ne muú ayi ajwólé mfaá agbare ẹlómé né ẹbwọ.

⁶ Nwú meko ayi alú ẹké meko muú ndere atane né geluagẹ́ menya yi mebe ẹyimbo ẹni ájó́ aké, “Ekpoko Flawa ẹma, ẹlú né ẹka utọ́ bíí uma ne makpoko barle alẹ́ alú ntó ẹka utọ́ bíí uma. Ne ọ́chọ́ge fọ́ mbwe mawéé ne mmọ́.”

⁷ Ne ji ámá ábeagẹ́ melu ẹma ẹwé ẹgbeé malu ani, nwú menya mebe ayi agbeé menya ẹni ndere ajọ́ aké, “Chwó we.” ⁸ Mpege, nge mpọ́ mekagala ayi ala bẹ́ ne muú ayi ajwólé né mfaá akamé́gẹ́ negbo. Ne muú ayifọ́, ayi akwọ́le ji meso, akamege melo áwuú bọ́. Achyẹ́ ẹbwó uto nnó akare mme meko né malu aní, áwá bọ́ né melu ẹma ne bee, mesa, ufọ́ ufọ́ mameé ne menyá ẹyi ẹpyé ẹfọ́.

⁹ Maá ẹgọ́me ábeagẹ́ melu ẹma ẹwé ẹgbeé malu ata, nge né nteé geluógẹ́ ọ́pe Ẹsọ́wọ́ mandoó bọ́ abi áwané gétúgẹ́ mekomejọ́ Ẹsọ́wọ́ ayi ẹbwó ágaré.

¹⁰ Ne mandoó bọ́ Ẹsọ́wọ́ bimbo, ájó́ kenké aké, “Eh Anyata Ẹsọ́wọ́, wọ́ ọ́lú muú ukpea ne bọ́ akage ánerẹ metọ́ ne wọ́. Ẹbelege mbọ́ nnó ne wọ́ ọ́sọ́ mpa bọ́ mme abi áwané ẹsẹ́, ọ́shuú ẹbwó amu manchyẹ́ ẹbwó ẹfwyale?” ¹¹ Ajọ́gẹ́ mbọ́, áchyẹ́ yéndémuú bwó ẹwule pópó, ne ágaré ẹbwó nnó ákoó metọ́, ágilé kpáá tẹ́ mpa atẹ aṣẹ ẹbwó abi ápyẹ́ utọ́ Ẹsọ́wọ́, ẹbwó abi áwané ákwanege ndere Ẹsọ́wọ́ akẹ́ge.

12 Ne maá egɔɔme ábeagé melu ɛma ɛwé egbeé malu akene, nge ndere mme anyigé ne ɛshye tegetege. Nmeé ɛbwólé elá megilé ɛké ndeé nekwi ne mfaá ntó agelé chuú ɛké manoó. 13 Ambe átane mfaá ákwe mme ɛké umpome genó fik ebi ula ugélé wó, ukwene gébé mbyo metometo anyigé ubi. 14 Nebuú neseé ɛké gebɔ ɛyi muú apwiré afeé ne mbaá ayi gebó gélú. Yéndé mekwɛ kpaá ne mewaá metó nnyi áferé ɛwu né melu wuú. 15 Ne afwa mme meko, bɔ́ kpakpa, ákpakpa bɔ́ bee, bɔ́ abi awyaá gefwa, anɔ́ bɔ́, ne bɔ́ ako choncho ne áfwɛ ne abi álá ápó áfwɛ ábó ájyɛ́ bíí né mmu ambu maba ntaá ne meso matarave ayi álú né mfaá makwɛ kpakpa, 16 ákalé ákuú maba ntaá ne makwɛ kpakpa áké, “Kwege débií ɛsé nnó ɛkágé muú ayi ajwólé né mfaá geluwógé gefwa age ɛsé ne nnó ɛkágé maá egɔɔme achyɛ́ ɛsé ɛfwyale. 17 Néndé gekpékpé bíí ebi ɛsɔwɔ ne maá egɔɔme achyɛge bɔ́ ɛfwyale ukwóne, ne ndémuú ákágé bo ɛfwyale ɛwémbɔ?”

7

Afyɛ geloge ɛsɔwɔ né mampwɛ usáá dɛle bɔ́ ɛsɔwɔ ukénéama meso ɛni

1 Unó bina uko ukógé, genó ɛyi me mma nge, elé makiénné ɛsɔwɔ ani. Átene né manjú mme ani, agbeé mati mbyo ani, ayi atanege né manku mme yina nnó ɛkágé mbyo ammyɛge né mme yé ɛbé lé né ɛbeé, ne nnó ɛkágé amugé unɔ́. 2 Ne nge ntó ekiénné ɛsɔwɔ ɛwé fó, ɛtane né egbe ɛwé ηmeé ɛtanege, egbare gelogé ɛsɔwɔ muú alu mebe ɛku makiénné ɛsɔwɔ yimbɔ ani kenké, ayi ɛsɔwɔ

achyɛ́ ǎji uto manchɔ mme ne ebɛ́ mega, ³ ɛkɛ́, “Tɛ́nɛ́gɛ́ kpe, dɛ́sage lyaá mbyo áchɔ́ mme, ebɛ́ mega, ne unɔ́ mewaá kpaá tɛ́ ɛ́sɛ́ denerege manlo baá dɛ́fwɛ́ ɛ́sɔwɔ́ ɛ́sɛ́ né mampwɛ́ ne gelogé ɛ́sɔwɔ́.”

⁴ Ne nwú nnó mpa bɔ́ ɛ́sɔwɔ́ abi álo ebwɔ́ né mampwɛ́ ne gelogé ɛ́sɔwɔ́ ɛyigé na, alú usaá dele bɔ́ ukénɛ́ama meso ɛni. Bɔ́ bina atane né mató Isrɛli áfyaneapeá.

⁵ Né ntoné Juda aló dele bɔ́ áfyaneapea.

Né ntoné Rubɛn aló dele bɔ́ áfyaneapeá.

Né ntoné Gad aló dele bɔ́ áfyaneapeá.

⁶ Né ntoné Ashyɛ aló dele bɔ́ áfyaneapeá.

Ntoné Naftali aló dele bɔ́ áfyaneapeá.

Ntoné Manasɛ aló dele ɛfyaneapeá.

⁷ Né ntoné Simyon aló dele ɛfyaneapeá.

Né ntoné Lɛvi aló dele ɛfyaneapeá.

Né ntoné Isaka aló dele ɛfyaneapeá.

⁸ Ntoné Sɛbulɔn aló dele ɛfyaneapeá.

Né ntoné Josef aló dele ɛfyaneapeá.

Né ntoné Benjamɛn aló dele ɛfyaneapeá.

Njuné bɔ́ átené né mbɛ ushu ɛ́sɔwɔ́ ne Maá ɛgɔɔme

⁹ Genó ɛyigé na gekoge, nke mpele, nge njuné bɔ́ abi yé muú alá ákágé pa fɔ́. Bɔ́ bina átané né malɔ́ mme meko, yéndé ntoó ufɔ́ ufɔ́ bɔ́, ne ufɔ́ ufɔ́ mejɔ́. Afyɛ mandeé pópó, ágbaré mame né amu átene né mbɛ geluɔge gefwa ne mbɛ ushu Maá ɛgɔɔme. ¹⁰ Ajógé kenké ákɛ́, “ɛ́sɔwɔ́ se, wɔ́ muú ɔjwɔ́lé mfaá geluɔge gefwa, ɛnyú ne Maá ɛgɔɔme ne dɛ́ferege ɛ́sɛ́ né ɛfwyale gabo.” ¹¹ Ajógé mbɔ́, makiénné ɛ́sɔwɔ́ ako átené áno geluɔge gefwa, ákpakpa bimɔ́, ne menya yimbɔ́ ɛni ɛyi elú mebe. Ne ebwɔ́ ako ákwe uwyá mme né mbɛ geluɔge

gefwa ánógé Ɛsɔwɔ, ¹² áké, “Amɛn, mejé, ne ηγω, ne denɣa, ne matame, ne ενόγέ, ne utó ne εshye ube ne Ɛsɔwɔ sé te kwyakwya ne kwyakwya Amɛn.”

¹³ Muú kpaá ama né geluɔge ákpakpa bimbɔ, agíí me áké, “Ndé bɔ́ na áfyéé mawulé pópó, átané ɛfɔ?”

¹⁴ Me nshuú ji meko nké, “Ata nkaá wó, wɔ ne ɔkaá mbaá ayi ɛbwó átané.”

Ne agaré yé me aké, “Gé bɔ́ abi ákpene né gekpekre ɛfwyale, átene ne εshye kpaá te átané cháñéné na. Ɛbwó áshwɔné mawulé bwó ne manoó Maá ɛɔηme, álá pópó. ¹⁵ Ne gétú ɛyigémbɔ ne ɛbwó átené né mbe geluɔge Ɛsɔwɔ, ápyéé utɔ́ ndere ampyéé ure Ɛsɔwɔ ne mmu echa ure wuú yéndégébé. Ne ji ayi ajwɔlé né mfaá geluɔge gefwa abéé nyɛ ne ɛbwó, abame ɛbwó. ¹⁶ Ɛbwó ábéé se mesa, mmwɔlé manaá ɛpye sé ɛbwó, ηméé ɛdoó sé ɛbwó ne menyammye ntó ásonégé sé ɛbwó. ¹⁷ Néndé Maá ɛɔηme muú alú kwókwólé ne geluɔgé gefwa ɛyigé na ne ábáme ɛbwó nkane membame magɔηme. Ne ajame nyɛ ɛbwó áfé ne baá anyi ayi awyaá manaá ami machyɛge geɣwá ɛyi gélagé byéé. Ne Ɛsɔwɔ ntó atilé nyɛ ɛbwó manse ako né amɛ.”

8

Maá ɛɔηme abea melú ɛma ɛwé ɛgbeé malu akénéama

¹ Ne Maá ɛɔηme ábeagé melú ɛma ɛwé ɛgbeé malu akénéama mbaá meko né mfaánebuú ákwené álá tɔmeé né genóge gebagé nchwa neke.

² Ɛpyege mbɔ, nge makiénné Ɛsɔwɔ akénéama

ndere átene né mbe ushu Esɔwɔ. Achyɛ́é áji mbá akénéama.

³ Ne ekiénné ewé fɔ egbaré maá gekú ayi ákwyɛ́é ne gul echwɔ́ɔ tené né mbe gelúɔ eyigé ásóó unó bi úwya gebe gelóǵéló. Achyɛ́é ewú gejaméǵé unó gebe bina nnó echo ne mmyemenene bóó Esɔwɔ ako, enere mfaá gelúɔ eyigé ákwyɛ́é ne gul eyigé gelú né mbe gelúǵé gefwage Esɔwɔ ásóó áchyɛ́é mbaá Esɔwɔ. ⁴ Ndere esóó unó gebe ebimbo, amuawe choncho ne mmyemenene bóó Esɔwɔ, átane né amu ekiénné Esɔwɔ ewémbɔ áfe né mbaá Esɔwɔ. ⁵ Epyege mbɔ, ekiénné Esɔwɔ ewémbɔ efere ujenje mewɛ né mfaá gelúɔ eyigémbɔ, efyɛ ne mmu maá gekú yimbo efome fa mme. Efóméǵé mbɔ, mbaá áwyale, mamfeé anyane gbanḡbanḡ, gasama akɛle mamamama, ne mme anyigé téǵé téǵé ne eshyɛ.

Makiénné Esɔwɔ ayi mbe ani afome mbaá ebwɔ

⁶ Ne makiénné Esɔwɔ yimbo akénéama ayi áǵbaré mbá akénéama, ákpome mmye mamfome.

⁷ Ekiénné ewé mbe éfomege mba áwuú, makankoma ne mewɛ echware ne manoó ekwe fa mme. Ne mewɛ ewémbɔ ekaré mme né malu aléé, esɔ melu ema kpákpá choncho ne unó ne byaá mewaá.

⁸ Ekiénné Esɔwɔ ewé egbeé apeá éfomege mbá wuú, áfome genó gefɔ ne mmu ebeé mega eyi gelú eké gekpékpéǵé mekwɛ ewé mewɛ elúlú wye wum wum wum. Genó eyigémbɔ gekwege gekare ebeé mega né malu aléé, melu ema elá manoó manoó. ⁹ Ne yéndégenó eyi gelú wyɛ́é gegbo, ne masogeka ayi alú wye áchóó.

10 Εwέ εgbeé áλέε εfɔmege mbá wuú, gekpékpégé membe ayi agenege eké gelɔgé εlwε, atane mfaá akaré manyi mme malu áλέε akwe né melú εma choncho ne baá anyi abi kɔkɔ́. 11 Membe yina ákamege nnó, “Unywɔne.” Ne melu εma εwé membe yina akwene wye, né geluage malu ayina áλέε εla nywɔne nywɔnege. Gejamege bɔ́ abi anyuú manaá ami matane wyéé ágbo.

12 Ne ekiénné Εsɔwɔ εwé εgbeé makiénné ani, εfɔmege mbá wuú, ákarege ndere ηmεé, mfaá, ne ambe ágenege sé né malu alεé, melu εma ekwe kendeé. Ne akarege gébé εyigé utuú uwyage né malu alεé mfaá ne ambe ágene sé ne melu εma wó. Wyembɔ ntó ne εpyéé ne bíi ne ηwɔmese.

13 Ne mbwε amε nké mpεle, nge ndere nenyanyelyenege te mfaá, ne nwu ndere nejɔ́ge kenké neké, “Εbɔ́ nyε, εbɔ́ nyε, εbɔ́ nyε ne bɔ́ abi álú né mme gebégé makiénné Εsɔwɔ ayi álaá áλέé áfɔmege mbá bwó.”

9

Εkiénné Εsɔwɔ εwé εgbeé makiénné ata εfɔme mbá wuú

1 Ne ekiénné Εsɔwɔ εwé εgbeé makiénné ata εfɔmege wuú mbá, mma nge membe fɔ atané mfaá, akwe mme. Achyεé ji agbógóló ayi anenege gepyεé εyi gélagé pó ne kwyakwya. 2 Ne membe yimbɔ anenege meno gepyεé εyigémbɔ, amuawε atane wye eké amuawε laáwa. Amuawε yina agbe ηmεé né mfaánebuú mbaá akwe gemuagemua. 3 Εgome εtane né mmu amuawε yimbɔ ekwe fa mme. Achyε εwú uto mantyε bɔ́ wye ndere εbi ngat áwyaá fa mme. 4 Agaré εwú nnó εpyεge fɔ́

genó gebo ne jyage fə, yé ebé lé dambyanja ne yéndé gefəgé genə, epye lé genó gebo ne bəó abi álá ápó ne gelogé Esəwə né mampwe bwó. ⁵ Achye fə ewú uto nnó éwá ebwó wó, alya elé ewú nnó etye ebwó né bə amfaá áta. Ne ubale ebi ebwó áwuú nyε ube wyε ndere ebi ngat atyéé muú. ⁶ Né amfaá bimbə áta, ákelege nyε negbo nnó newa ebwó ágene. Néndé yé lé ebwó áshyage negbo, negbo nebéé fə ebwó kwókwólé.

⁷ Egome ewéna, elú eké mpó mekagala eyi áfyε eji unó manjye bee. Akwere ewu unó fə né makpo, unó bimbə úlú eké délaré gefwa etiré ákwyéé ne gul, ne mashu ebwó malu eké mashu akwaá. ⁸ Mejwe bwó eshya metyéé eké mejwe andée ne manéné bwó álú eké ayi genyanya. ⁹ Akwere uwya yéndé egomé ne gebagé gese eyigé bəó abi ájyéé bee ákwerege né uwya. Gewya eyigé ubagele bwó upyéé gélu eké gewyage mboó gese uka upea ayi mpəó mekagala ejame ne gatele ejyéé bee. ¹⁰ Egome ewémbə ewyaá magyéé eké magye ngat. Ewya uto né magye bwó matyéé bəó né bə amfaá áta. ¹¹ Ne muú ayi álú mfwa bwó, elé ekiénné Esəwə ewé egbare agbógóló gepyéé eyi geláge pə ne kwyakwya. Bəó Hibru akú ekiénné ewéna nnó Abadən. Ne bəó Grek ákuú ewú nnó Apolyən (ula utene nnó menchə unó).

¹² Nénjáne efwyale eniné mbe nekoó, wúgé ayifə apea alú chwəó.

Ekiénné Esəwə ewé egbeé makiénné akéné efəme mbá wuú

¹³ Ne ekiénné Esəwə ewé epyéé makiénné akéné, éfəmege mbá wuú, nwú meko muú fə ndere atane

né manjú ani ayi alú né geluó eyigé ákwyéé ne gul eyigé gelu né mbe ushu Esowó. ¹⁴ Meko yimbó ajóó ne ekiénné Esowó ewémbó aké, “Kaá makiénné ani ayi áfené kwókwólé ne ebeé kpa ewé ákuú nnó ebeé Yufretis.” ¹⁵ Ne ekiénné Esowó ewémbó ekaá ayina ani. Elé né nchwónেকে eniné na, né bií ebi na, mfaá ayina ne ημεέ eniné na, ne Esowó abelé me nnó makiénné ayina ákáré bóó abi álu fa mme malu áléé, áwá melu εma. ¹⁶ Agare me aké mpa ekwó bóó abi ákwóme né mfaá mpó mekagala ájyεé bee aja kpaá apwó, alú bó dele ne bó dele. ¹⁷ Né ame gejya yina, ngé mpó mekagala ne bóó abi ájwólé mfaá εji. Bóó bimbó áfyεé uba useé ummye ebi bóó bee ákwerege né uwyá. Ubaá useé bina ugelege eké mewε, uwyáá ugile nkane genó eyigé ákuú nnó Safaya, ne úlú ntó ekwóekwó eké genó eyigé ákuú nno solfó. Mpó eyina ewyaá makpo eké makpo genyanya. Mewε, ne amuawε, ne solfó etanege εji né meno. ¹⁸ Unó bina uléé, ebi uwáne bóó ubi utané né mano mpó eyimbó, mmye eké mewε, ne amuawε ne solfó ukare bóó abi alú fa mme né malu áléé uwa melu εma. ¹⁹ Néndé eshye mpó eyina etanege elé né manó ne magye ebwó. Magye bwó áwya makpo eké mmyó. Elé ne magye ebwó yina, ne echulé bóó.

²⁰ Ne bóó abi unó bina ula uwa wó, ályaá fó gabo ayi ebwó ápyεé wó. Anógé wye aló nchye ne aló uka abi ákwyéé ne gul ne seleba akwyéé ntó ne afyaákó, mataá ne unóó. Yé elé aló uka bina, álá áwuú, álá ágené ne álá ákené fó, ebwó ánógé wye abi. ²¹ Ne ályaá fó ntó bóó manwáne wó yé elé mafoó manye, manane tametame ne εjo manjo ályaá wó.

10

Ɔn agé ekiénné Ɖsɔwɔ né amɛ geɟya ndere egbaré gebagé ηwe eyi apwiré

¹ Ne mma ngé gekpékpégé ekiénné Ɖsɔwɔ ewé fɔ né amɛ geɟya, etane né mfaánebuú eshulege mme. Ndere ewú echwɔ́, geko gefyale ewú mmye eké ndeé, ne embya meshu egyaá ewú né mekpo, ushu bií ushwanege eké ηmɛé ne uka ebií ntó úlú eké ukwa bi mewɛ elúlé wyeé. ² Egbaré gebagé ηwe ayi abɔ apwiré, nana gelu fuú né ebwɔ wuú. Echoó geka jii eyi ebwɔnyɛ né ebeé mega ne eyigé ebwɔbe né mewaa. ³ Eɟɔ́ kenké ekále eké meko genyanya. Ekalege mbɔ, néfe nnya nekame gbangban ndɔ ekénéama neshuú ewú meko. ⁴ Ne nefe enina neyáge mbɔ, nké nsa genó eyigé me nwuú neɟɔ́, nké nwuú meko muú fɔ atané né mfaánebuú aɟɔ́ ne me aké, “Ɖsage fɔ genó eyigé nefe enina neɟɔ́, bele geji ne metɔ́ wyeé.”

⁵ Ne ekiénné Ɖsɔwɔ ewémbɔ ewé ngene etene né mewaa né ebeé mega, ebwɛé ebwɔnyɛ wuú né mfaánebuú. ⁶ Ekele mabɔ Ɖsɔwɔ, muú alú mebe te kwyakwya, muú akwyéé mfaá, mme, ebeé mega, ne yéndégenó eyi gelú wyeé eké, “Njógé wáwálé nnó gébé geɟɔ́ gepó esé. ⁷ Yémbɔ ekiénné Ɖsɔwɔ ewé epyéé makiénné ákénéama efómégé mba awuú, Ɖsɔwɔ apyéé nyé unó bi ji abɔ ábelé bibí upye wáwálé ndere ji agaré bɔ́ utɔ́ bií bɔ́ ekpávɛ Ɖsɔwɔ nnó upye nyɛ.”

⁸ Ne mako ayi me mbɔ nwuú atane mfaánebuú ama aɟɔ́ ne me aké, “Chwɔ́ sé gegbagé ηwe yimbɔ né ebwɔ ekiénné Ɖsɔwɔ ewé echoó geka ebeé mega ne geka mewaa.”

⁹ Ajógé mbò, mfe mbaá ekiénné Èsòwò ewémbò, ngií ewu nnó echyéé me gebagé ηwe eyimbò, ejóó ne me eké, “Sε geji ònyé, gebóóge nyε wò né meno eke nnywóó yémbò gekwónégé wò unε genywònege nyε.”

¹⁰ Ne nσε gebagé ηwe eyimbò né εbwò wuú nnyé. Gebóóge me né meno eke nnywóó ne gekwònege me né unε gelá nywòne nywònege. ¹¹ Nyége mbò, ágaré me aké, “Όbò maá ma garé genó eyi gepyεé nyε ne bóó malò mme meko, ufóó ufóó bóó, ufóó ufóó mejóó ne afwa.”

11

Èsòwò atò bóó ekpávέ apeá

¹ Unó bina ukogé, áchyéé me meto ewé ámege unó wyεé. Ne Èsòwò ajóó ne me aké, “Chó mεé εcha upε wa ne geluógé upε. Pa ntó bóó abi ánógé me wyε. ² Yémbò, òmege fó dachi εcha upε wa, lyaá ji néndé me nlyaaá ji mbaá bóó abi álá ápó bóó Jus, nnó ágbaré gefwage bwó né melò ukpea wa né bó ámfaá usa upea meso εpea. ³ Ne ntòme nyε bóó ba apeá abi ágaregé mekomejóó Èsòwò, nchyεge nyε εbwó uto mangaré bóó genó eyi me mpyε nyε. Ne ágaregé nyε geji, áfyεé mandeé nekwi né ndò ðele meso usaá ufya ne εléé.”

⁴ Bóó bina apeá ne álu eké unóó Olif upeá ne álu ntó eké uluò matúlékan upεa εbi utene né mβε ushu Èsòwò Ata muú ágbáregé gefwa mme. ⁵ Ne mbógé muú amuagé mampyε εbwó genó gebo, mewε εtanege εbwó né meno εsóó muú mawame εbwó yimbò, mbòntó ne bóó abi amuame mampyε εbwó genó gebo, ábóó mamgboó. ⁶ Εbwó áwyaá

uto magbaré manaá nnó ákwegé fɔ né gébé ɛyigé ɛbwɔ ágaregé mekomejɔ́ Ɛsɔwɔ. Áwyaá ntó uto mambwɔlé manyi ála manoó manoó. Ne áwyaá ntó uto mantɔ mameé ufo ufoó áchwɔ fa mme ndere ɛbwɔ ákɛlege.

⁷ Anerege mangaré mekomejɔ́ Ɛsɔwɔ, menya mebo ayi atané né gepyɛé ɛyi geláge pɔ ne kwyak-wya achwɔ mmyɛ nyɛ ne ɛbwɔ apwɔ, awá ɛbwɔ. ⁸ Ne unkwɔ bwɔ ulaá nyɛ né metɔ́ melɔ́, melɔ́ kpaá ɛwɛmbɔ mbaá ayi aselé nya Ata sé áwɔme nya né gekwa. Ne mabɔ ami ákuú melɔ ɛwéna né neka elé Sodom yé nnó Ijip. ⁹ Ufoó ufoó bɔ́ yéndé ntoó, ufoó ufoó mejɔ́ ne malɔ mme mako átane áchwɔ́ ágene unkwɔ bwɔ né ndɔ ɛlé ne geba, ákamegé fɔ nnó muú áníí ubi. ¹⁰ Matɔ́ ágɔ́ nyɛ bɔ́ mme meko ndere bɔ́ bina ápea ágbóo, ne ápyɛé nyɛ epaá gétúgé negbóné bwɔ, áwélé ate mako néndé mekomejɔ́ Ɛsɔwɔ ayi bɔ́ bina ágaré ápyɛé bɔ́ mme áwú ubalé dɔ́. ¹¹ Yɛmbɔ ndɔ yina ɛlé ne geba ɛkogé, Ɛsɔwɔ atɔ́mé geɟulé ɛyi geɟyɛge geɟwá gekpe unkwɔ bɔ́ bina né mmyɛ ákwilé téné. Ákwilége mbɔ bɔ́ ako abi ábɔ́ ágené ɛbwɔ ɛfo ɛkwɔ ɛbwɔ né matɔ́ dɔ́. ¹² Ne bɔ́ bina ápeá, áwú meko muú fo ndere ákuú ɛbwɔ kenké né mfaánebuú, aké, “Kwɔgé déchwɔ wena.” Ne ndere bɔ́ mawáme bwɔ ápelé, ɛbwɔ ákwɔ áfé né mfaánebuú né mmu gekó. ¹³ Wyɛ né gébé ɛyigémbɔ, mme ányígé ne ɛshyɛ tegetege ákáré melɔ ɛwɛmbɔ né malú afya, ne upú ɛbi úlú né melu ɛma ukwe ne mmyɛ muú ayi ágboó álú dele bɔ́ akénéama. Bɔ́ abi álá, ɛfo ɛkwɔ ɛbwɔ matɔ́ ánógé Ɛsɔwɔ muú olú né mfaánebuú.

¹⁴ Neɟáne ɛfwyale ɛniné negbée maɟáne apeá

nekoó, wúgé eniné negbeé áléé nechwáó.

Ekiénné Ẹsṳwṳ ẹwé ẹgbeé makiénné akénéama ẹfṳme mbá wúú

¹⁵ Ne ekiénné Ẹsṳwṳ ẹwé ẹgbeé akénéama ẹfṳmégé mbá wúú, nwú meko makiénné Ẹsṳwṳ ndere ájógé kenké áké, “Ata Ẹsṳwṳ sé ne muú wúú ayi ji ayaá nnó ábé mempoó se awyaá uto mangbaré gefwa fa mme nana. Ne Ẹsṳwṳ ágbáregé gefwa ƣe kwyakwya ne kwyakwya.”

¹⁶ Ajógé mbṳ, ákpakpa bimṳ, esaá meso eni abi ájwálé mfaá uluṳ gefwage bwṳ né mbe ushu Ẹsṳwṳ ákwe mashu mme né mbe ushu Ẹsṳwṳ áféé Ẹsṳwṳ, ¹⁷ áké, “Ata Ẹsṳwṳ, wṳ Muú Ɔpwáó amu, wṳ muú ɔlu ne ɔbo ɔlú, ẹsé déchyege wṳ matame néndé ɔleré gekpékpégé uto bi wṳ ɔwyaá ne ɔbo mangbaré gefwa jyéé fa mme. ¹⁸ Ne bṳó abi abṳ alá ápṳ fṳ Jus, ẹbwṳ ábṳó metṳó usṳó ne wṳ dṳó. Yémbṳ gébégé eyigé wṳ ɔlerégé metṳó usṳó wyé gekwṳné. Ne gébé gekwṳné eyigé wṳ ɔsṳó mpa bṳó abi ágbṳó. Gébé ntó gekwṳné eyigé wṳ ɔchyege nsa mbaá bṳó utṳó byéé, bṳó ẹkpávé Ẹsṳwṳ ne bṳó ako abi áfṳó wṳ, abi aṳea geme ne abi alá aṳea wṳ. Ne gébé gekwṳné eyigé wṳ ɔwane bṳó abi áwáne bṳó ako abi áwáne bṳó fa mme yina.”

¹⁹ Aféége Ẹsṳwṳ mbṳ, gepúgé Ẹsṳwṳ né mfaánebuú génene. Ne mengé mekwaá menomenyéé ẹwé ẹtené mbaá menomenyéé ẹwé Ẹsṳwṳ anyéé ne bṳó bíí ndere ẹlú né mmu gepúgé Ẹsṳwṳ eyigémbṳ. Ne ngé ndere gasama akelé mamama, nefe nénya gbanṳbanṳ, mbaá áwyaale mme anyíí tegetege, ne makaṳkoma akwene gejame.

12

Mendée fɔ ne mmyɔ ayi ákuú nnó dragɔn

¹ Né gébé εyigémbɔ, ngé gekpékpéégé genó fɔ eyi getané né mfaánebuú. Ngé mendée fɔ ayi ndée eyi ji afyεé elú ηmεé ηmεé, anεré uka bíí né mfaá mfaá. Akwere εlá gefwa εwé εwyaá ambe áfyaneápeá. *

² Mendée yina alú ne unε, ne ndεere nebyεé némyεé ji ákalege gétúgé awuú ubale nebyεé.

³ Ne mma ngé gekpékpéégé genóge fɔ eyi getané né mfaánebuú, nké mpelé, ngé gekpékpéégé mmyɔ megele, ayi apyεé εfɔ, awyaá makpo akénéama ne ambya afya. Ne akweré maá εlá gefwa né yéndé mekpo wuú. ⁴ Akaregé ambe ayi alú né mfaá né malu áléé, mmyɔ ayina ase megyε wuú ajá melú εma agβε fa mme. Akwilé atene né mβε ushu mendée yimbɔ ayi alú mambyε maá, agile nnó mendée yimbɔ abyεgé maá ji abɔ ányεé.

⁵ Ne mendée yimbɔ abyε maá wuú mende. Maá yimbɔ ne abɔ́ mámβε mfwa né malɔ mme meko. Agbaregé nyε bɔ́ mme meko ne amu matomato. Ndεere ábyené maá yimbɔ, áchwó fɔ́ ji ákpa ji áfé mbaá Εsɔwɔ né mbaá ayi geluɔge gefwa jíí gelú.

⁶ Ne mendée yina jimbɔ́ abó afé né mashwɔne mbaá ayi Εsɔwɔ ákwyεé ábelé nnó ji abε wyεé, akpe bu né ndɔ dele meso usaá ufyane ulεé meso εfyá.

⁷ Εpyεgé mbɔ, ummyε ukwe né mfaánebuú. Mfwa makiénné Εsɔwɔ ayi akuú ji Mikεl ne anɟba bíí, ámyε ne mmyɔ yimbɔ ne bɔ́ bíí ntó. ⁸ Yémbɔ Mikεl ne anɟba bíí ámmyε ápwɔ mmyɔ yimbɔ ne bɔ́ bíí ne ákamé sé nnó mmyɔ yimbɔ ne bɔ́

* **12:1** Elú wáwálé nnó: Mfaá ayi ájógembo, elé mfaá ayi ágεnege ne utuú.

bií ama abɛ ne melú manjwólé né mfaánebuú wó. ⁹ Abú gekpékpé mmyɔ yimbɔ né mfaánebuú áshulé fa mme chóncho ne makiénné jíí. Mmyɔ yina ne ákuú nnó danchɔmeló, muú mawáme, jí ne alú mmyɔ ayi aló mé tété nya mambwólégé bɔ́ fa mme.

¹⁰ Ne nwú muú fɔ́ ajó kɛɲké né mfaánebuú aké, “Nana Ɛsɔwɔ ɛsé aferé bɔ́ né ɛfwyale gabo, alɛre bɔ́ ako uto bií jí awyaá né gefwa ɛyigé jí ágbárege ne Kras, Muú yi Ɛsɔwɔ akweré jí elá gefwa ayi jí atɔmé alɛre ntó uto bií fa mme. Néndé muú ayi aténege né mbɛ ushu Ɛsɔwɔ sé utuú ne ɲwɔmésé ápyɛ mpa ne aɲmé sé ábú jí né mfaánebuú ashulé fa mme. ¹¹ Ne aɲmé ɛsé bina ammyɛ ápwɔ jí né uto manó Maá ɛgóɲme ami magbelé mme ne abya melóméló ayi ɛbwó ágarége. Ne ɛbwó áse yé geɲwá bwó ɛké genó wó ne átene nnó yé ɛbe elé negbo ɛbwó ágboó. ¹² Mfaánebuú ne bɔ́ ako abi ájwólégé wyɛ, bɛége ne nechóchó. Yémbó ɛbɔ́ nyɛ ne ɛnyú abi délú né mme ne mabéé mega néndé, danchɔmeló ashulé achwó báne ɛnyú ne metó usɔ néndé jí akaá nnó gébé jíí ɛyi gelaá géjásé wó.”

¹³ Mmyɔ yimbɔ agége nnó ábú jí ashulé fa mme, alɔ mamfwénégé mendée yimbɔ ayi ábyɛné maá mende nnó awá. ¹⁴ Yémbɔ áchyɛ mendée yimbɔ ukpékpé ubagele upeá ebi úlú ɛké ebi nɛnya nnó ályéné ájyɛ ábí né mashwɔne mbaá ayi Ɛsɔwɔ ákwɛyɛ ábelé nnó jí abéé wyɛ ábelé jí bu né aɲme áléé ne geba. ¹⁵ Ne mmyɔ yimbɔ awó manaá né meno, majá ɛké ɛbéé nnó ɲgbannyi ashwa mendée yimbɔ anó nnyi. ¹⁶ Yémbɔ mme apoó mendée yimbɔ, anéné meno anyú manaá ami mmyɔ yimbɔ awó mako. ¹⁷ Ɛpyegé mbɔ, mmyɔ yimbɔ metó

esó ji dṵṵ ne mendée yimbṵ, alyá ajye ηme ummye ne upyáne mendée yimbṵ, bṵṵ abi ábélege mabé Esṵwṵ ne bṵṵ abi ágaregé wáwálé ayi Jisṵs aleré né abya melóméló, nnó ebwṵ ne Mmyṵ yimbṵ atené né mbale ebéé mega.

13

Menya mebo ayi atáne né mmu ebéé mega

¹ Ndere mmyṵ yimbṵ aténe ewú, ngé menya mebo fṵ ndere atanege né mmu ebéé mega. Menya yimbṵ awyaá makpo akénéama, ne ambya afya. Ákweré maá ela gefwa né yéndé embya wuu. Né mfaá yéndé mekpo wuu asa mabṵ wye ami machṵṵ mabṵ Esṵwṵ. ² Menya yimbṵ afulé mekwaálá, awyaá uka eké ebi menya fṵ ayi afulé maamyε ákuú ji nnó beé. Ne meno wuu elú eké menó genyanya. Ne mmyṵ yimbṵ achyεé menya mebo yimbṵ, uto ebií ne gekpekepegé eshye wuu nnó, agbaré gefwa. ³ Menya yimbṵ, mekpo wuu ema, elu eké abṵ akε gepa wye eyi gelú manwá ji wáne, yémbṵ gepa eyigémbṵ, gegbo mé. Ne bṵṵ mme meko álá mano mekpo fuú gétúgé genó eyina, áló mankwṵlege ji. ⁴ Ebwṵ ako ánógé mmyṵ yimbṵ gétúgé ji achyεé uto bií mbaá menya mebo yimbṵ. Ne ánógé ntó menya mebo yimbṵ ajógé aké, “Ndémuú alú eké menya yina, ne waá ákágé mmye umye ne ji?”

⁵ Ne ályaá menya mebo yimbṵ nnó ádógé ebwṵ ewṵme áchógé mabṵ Esṵwṵ, ne ályaá ji ntó nnó aleré uto bií né usaá bṵ amfaá upeá meso epeá. ⁶ Menya mebo yimbṵ aló manlwεerege Esṵwṵ, achṵṵ mabṵ mií ne ami bṵṵ Esṵwṵ abi álú né mfaánebuú.

⁷ Achyɛɛ ji ntó uto nnó ammyɛ bee ne bɔ́ɔ Ɛsɔwɔ fa mme apwɔ ɛbwɔ́. Ne áchyɛɛ ji ntó uto nnó, abɛ mfwa mbaá matóó mme mako, ufɔ́ɔ ufɔ́ɔ bɔ́ɔ, ufɔ́ɔ ufɔ́ɔ mejɔ́ɔ, ne malɔ mme mako. ⁸ Ne bɔ́ɔ ako abi álú fa mme ánógé nyɛ menya mebo yimbɔ́. Ɛbwɔ́ bina ne tɛ ula ulɔ́ɔ mme álá ása fɔ́ mabɔ́ bwɔ́ né mmu ηwɛ ayi asame mabɔ́ bɔ́ɔ abi ábɔ́ɔ nyɛ geɟwá ɛyi gélágé byé. Nwɛ yimbɔ́ elé ayi Maá ɛgɔɟme ayi abó awáne.

⁹ Muú ayi awyaá matu áwú. ¹⁰ Yéndémuú ayi Ɛsɔwɔ ajɔ́ɔ mé nnó apyɛ ji, apyɛne nyɛ ji. Yéndémuú ayi Ɛsɔwɔ ajɔ́ɔ mɛ nnó áwá ji ne aparanja, áwané nyɛ ji ne aparanja. Ɛwéna elú elé majyɛ mbaá bɔ́ɔ Ɛsɔwɔ nnó abɔ́ mankogé matɔ́ɔ, áfyɛɛ wyɛ metɔ́ɔ ne ji.

Menya mebo ayi átane né mmu mme

¹¹ Ne mma ngɛ menya mebo ayi fɔ́ ndɛre atanegɛ né mmu mme. Awyaá ambya apeá ɛké maá ɛgɔɟme, ne ajógé mejɔ́ɔ ɛké mmyɔ́. ¹² Aɛ uto uko ɛbi menya mebo ayi mbɛ awyaá apyɛ ukpɛkpɛ unó né mbɛ ushu wuú. Apyɛɛ mme ne bɔ́ɔ ako abi ájwɔlegé wyɛ ánógé menya ayi mbɛ yimbɔ́, ayi gepa ɛyi gelu manwá ji gegbóo. ¹³ Ne menya mebo yimbɔ́, ayi atane né mmu mme, apyɛ ukpɛkpɛ ufélekpa ɛbi yɛ ɛbelé mewɛ ɛtane né mfaánebuú ɛkwe mme bɔ́ɔ ako agé. ¹⁴ Abwɔ́lé bɔ́ɔ abi álú fa mme né ufélekpa ɛbi ályaá ji apyɛɛ né mbɛ ushu menya ayi mbɛ. Agaré ɛbwɔ́ nnó ákwyɛɛ meló uka ayi afulé menya ayi abɔ́ akélé ji gepa ɛyi geké gewa ji yémbɔ́ álá gbóo wɔ́. ¹⁵ Ne ályaá menya ayina nnó ato geɟulé mbaá meló uka yimbɔ́ nnó abɔ́ geɟwá, ájógé mejɔ́ɔ, apyɛ nnó áwá bɔ́ɔ ako abi álá ánógé

fɔ ji, ¹⁶ apyɛ ntó áfyɛ bɔ́o ako gelo né egbe ebwɔnyɛ yé ne mampwɛ. Abi álá aɲea gemɛ wɔ́ ne abi aɲea gemɛ, ubyá bɔ́o, afwa ŋka, afwé ne abi álá pɔ́ afwé, afyɛ ebwɔ́ uló mmyɛ. ¹⁷ Apyɛmbɔ́ nnó muú álá pɔ́ ne gelo eyigémbɔ́ ákpogé fɔ́ genó yé ebé elé mana genó anamé fɔ́. Ne gelo eyigémbɔ́ geténé mbaá mabɔ́ menya mebo ayi mbe, yé ebe elé nɔmba ayi aténé mbaá mabɔ́ mí.

¹⁸ Ewéna elú lé majyɛ mbaá bɔ́o ako nnó yéndémuú abɛ ne denɲa né mechɔ́ ewéna. Ne yéndémuú ayi awyaá defɔ́o afere akaá ulaá geloge menya ayina. Geji geténe mbaá mabɔ́ mekwaá. Ne gelo jí elé “666”

14

Maá egɔɲme ne usaá dɛle bɔ́o ukénéama meso eni

¹ Ne nké mpelé, ngé maá egɔɲme ndere aténé né mfaá mekwɛ ewé ákuú nnó Sayɔn ne usaá dɛle bɔ́o ukénéama meso eni. Asa mabɔ́ Maá egɔɲme ne ami Nte wuú né mampwɛ ebwɔ́. ² Ne nwú meko muú fɔ́ né mfaánebuú, meko yimbɔ́ awyale eké meko makɔne nnyi ne anyáne ntó kenké eké nefe. Meko ayi nwú mbɔ́ alú eké bɔ́o ákwelé bɔ́ dandyɛé ebwɔ́. ³ Ne njune bɔ́o bina ákwa ekwɔ́ mekɛ né mbe geluɔge gefwage Eɔwɔ́ ne menya eni eyi elú mebe ne ákpakpa. Ne yé muú ayi ákágé ekwɔ́ ewéna apɔ́, ekosé ebwɔ́ ambɔ́o ne ákaá. Ebwɔ́ bina ne álú bɔ́o abi Eɔwɔ́ áwené gemége ebwɔ́ né gabo fa mme. ⁴ Ebwɔ́ bina ne álú bɔ́o abi ábele menyammyɛ ebwɔ́ pɔ́pɔ́ yé andée álá akaá wɔ́, gétúgé álú ubwyɛne. Ebwɔ́ ákwɔ́lege Maá egɔɲme ájyɛ yéndé mbaá ayi jí ájyɛé. Alú bɔ́o abi Eɔwɔ́ áwené gemége bwɔ́ né gabo né geluage bɔ́o ako abi álu fa mme. Ebwɔ́ álu

ndere mbwe mbe ayi áchyéé mbaá Ɛsɔwɔ ne Maá ɛgɔɬme. ⁵ Gebyɔ gepɔ fɔ ɛbwɔ né meno néndé ɛbwɔ álu pópó ápó ne deba.

Makiénné Ɛsɔwɔ áléé ágaré mekomejɔ Ɛsɔwɔ

⁶ Ne mma ngé ekiénné Ɛsɔwɔ ɛwé fɔ ndere ɛlyenege té mfaá. Ɛkpa abya melóméló ayi álu tɛ kwyakwya mangaré mbaá bɔ́ malɔ mme meko. Yéndé ntoó, ufɔ́ ufɔ́ mejɔ́ ne ufɔ́ ufɔ́ bɔ́. ⁷ Ɛjɔ́ ne meko kenké ɛké “Ɛgɛ Ɛsɔwɔ ne nógé ji néndé gébé gekwané ɛyigé ji asɔ́ mpa bɔ́ fa mme. Ndere ɛlúmbɔ, fɛge ji muú akwyéé mfaá ne mme chónchó ne mabéé mega ne ambu annyi.”

⁸ Ekiénné Ɛsɔwɔ ɛwé fɔ ɛwé ɛgbeé makiénné ápeá ɛchwɔ ntó, ɛké, “Babilɔn ákwe, meló ɛwé ɛbɔ ɛlú meló ɬgɔ ɛkwe ‘burup’ ɛwɔ ɬgma mme. Manane jíí ayi ji anané tametame áchó malɔ mme mako. Manane ji yémbɔ alu ɛké ɛlé mmɔ́ ne ji achyéé malɔ ayifɔ anyuú mapyɛné ɛbwɔ.”

⁹ Ne ekiénné Ɛsɔwɔ ɛwé fɔ ɛwé ɛgbeé makiénné áléé ɛchwɔ ntó, ɛjɔ́ ne meko kenké ɛké, “Bɔ́ abi ánógé menya mebo ne meló uka wuú, ne ákame nnó menya yimbɔ afyéé ɛbwɔ gelo jíí né mampwe ɛbwɔ yé né amu ɛbwɔ, ¹⁰ Ɛsɔwɔ achyéé nyɛ ntó ɛbwɔ ɛfwyale. Ɛfwyale ɛwémbɔ ɛbé nyɛ ɛké mmɔ́ matomato ami álá áchwaré ne maná wɔ́, amí Ɛsɔwɔ afyéé né mmu ɬkɔ wuú ayi metɔ́ usɔ́. Ne Ɛsɔwɔ apyɛ nyɛ ɛbwɔ á́sɔ́ né mmu mewɛ ɛwé ɛlulé ne genó ɛyigé ákuú nnó sɔ́lfɔ. Ne ɛbwɔ á́sɔ́gé nyɛ né mbe ushu makiénné ukpea ne Maá ɛgɔɬme. ¹¹ Ne amuawɛ ayi atanegé né mewɛ ɛwé ɛsɔ́ ɛbwɔ, átanegé nyɛ wyɛ tanegé té kwyakwya ne kwyakwya. Bɔ́ bina abi ánógé menya mebo yimbɔ

ne melo uka wuú ne yendemuú ayi ákame nnó menya yimbɔ afyɛé ji gelo eyi getene mbaá mabɔ mií, ugbeé mmyɛ upó ne ebwó utuú ne nwɔmese.”

¹² Mechɔ ewéna elú elé majyɛé mbaá bɔɔ Ɛsɔwɔ nnó ákogé matɔɔ ebwó. Ebwó bina ne ábélege mabe Ɛsɔwɔ ne áfyɛé wye metɔɔ ne Jisɔs.

¹³ Ne nwú meko muú fɔ né mfaánebuú nkane ajógé ne me, aké, “Sa meko mejɔɔ eyina: aké elɔ nana ejyɛgé mbe metɔɔ megɔmegɔ ebéé ne bɔɔ abi ágboó ndere áɲkwólé Jisɔs Kras.” Ajógémbɔ Mendoó Ɛsɔwɔ ekamé eké “Ɛeh elú wáwálé. Ebwó ágbéegɛ nyɛ mmyɛ né utɔɔ ebwó néndé nsa utɔɔ ulúlú ebi ebwó ápyɛé akwɔlege nyɛ ebwó.”

Jɔn agé amɛ geja ndere Ɛsɔwɔ asɔɔ nyɛ mpa bɔɔ né bií bi kwyakwya

¹⁴ Ne nké mpɛlé, ngé geko eyi gelu pópó, ne muú fɔ ajwólé né mmu geko eyigémbɔ alú eké maá nte mekwaá, akweré ɛla gefwa ewé akwyɛé ne gul. Agbaré ɲga mechyamechya né ebwɔ wuú, ɲga yimbɔ awya geti getyɛ getyɛé. ¹⁵ Ne ekiénné Ɛsɔwɔ ewé fɔ etane né ɛcha upɛ Ɛsɔwɔ, ekú muú ayi ajwólé né mmu geko kenké eké, “Lɔ mankyɛ mbwɛ ne ɲga wye ayi ɔgbaré, néndé gébé eyigé ákyɛ mbwɛ gekwané ne mbwɛ ayi álu né mme ákwɔné mankyɛ.” ¹⁶ Ejógé mbɔ, muú yimbɔ né mmu geko afu ɲga wuú né mme, akyɛ mbwɛ né mme meko.

¹⁷ Ɛpyɛgé mbɔ, ekiénné Ɛsɔwɔ ewé fɔ etané né mmu ɛcha upɛ Ɛsɔwɔ né mfaánebuú. Ewú ntó ɛgbaré ɲga mechya yimbɔ ayi ákuú nnó shɛkel.

¹⁸ Ne ekiénné Ɛsɔwɔ ewé fɔ, ewé ebɔɔ uto ɛpwá mewɛ etané kwókwólé ne geluógé upɛ Ɛsɔwɔ, ekúu ekiénné ewé ɛgbaré ɲga mechyamechya ejɔɔ kenké

eké, “Gé umpɔme unɔ́ ɛbi ákuú nnó grɛp, uwɔme né mme ugɛle. Cho sɔ́ uchóchó bwó ne n̄ga ayi wɔ ɔgbaré mbɔ.” ¹⁹ Ejógémbɔ, ekiénné Ɛsɔwɔ ɛwémbɔ, ɛfɔ n̄ga wuú fa mme, ɛsɔré umpomé grɛp ɛbimbɔ, ɛju né mmu ɛjya ɛwé aɲamege ubi wye. Ɛjya ɛwéna ɛtène mbaá metɔ́ usɔ́ Ɛsɔwɔ ɛwé ji áleregé nyɛ bɔ́. ²⁰ Ɛjya ɛwéna ɛpófó né melɔ. Ɛfɛmbó ne ájyale upɔme ɛbimbɔ manó matané, makó byɔgɔlɔgɔlɔ eké ɛbɛé. Metyɛé ɛbɛé manó ɛwémbɔ elú usaá n̄kpa nekɛ ufya. Ne ugome ɛbɛé ɛwéna úlú genóge matyɛé amu ápeá.

15

Makiénné Ɛsɔwɔ akénéama áchwó ne ufɔ́ ɛfwyale ukénéama

¹ Unó bimbɔ ukoógé, mma ngé gekpékpé gé genó gefɔ́ né mfaánebuú ɛyigé me nlá nkágé garé. Geɲeá ne gepwɔ amu. Genó ɛyigémbɔ elé makiénné Ɛsɔwɔ akénéama ayi akpané ufɔ́ ɛfwyale ukénéama. Ɛfwyale ɛwéna ne elu ɛwé kwyakwya néndé elé né ufɔ́ ɛfwyale bina ne Ɛsɔwɔ alerege nnó metɔ́ usɔ́ wuú ɛbye.

² Ne ngé genóge fɔ́ ɛyi gelú eké ɛbɛé mega. Gelú ɛfɛé ɛfɛé áchwaré ne mewɛ. Ne bɔ́ abi ammyɛé apwɔ́ menya mebo yimbɔ ne meló uka wuú, ne alá akamé fɔ́ nnó afyɛé ɛbwó gelo né mmyɛ ɛyi getène mbaá mabɔ mii wó, átené né mapeá ɛbɛé mega ɛwéna ɛwé elú ɛfɛé ɛfɛé. Agbaré man̄ke ayi Ɛsɔwɔ achyɛé ɛbwó. ³ Ne ákwa ekwɔ ɛwé Mosis muú utɔ́ Ɛsɔwɔ abó akwané ne ɛwé Maá ɛgɔɲme abɔ akwane, aké, “Ata Ɛsɔwɔ Muú Ɔpɔwɔ́ amu, unó bi wɔ ɔpyɛé úlú ukpékpé ne upwɔ́ amu. Wɔ ɔlu mfwa malɔ mme mako. Depó etyɛ etiré wɔ ɔpyɛ

délú wáwálé ne cho. ⁴ Ata yé muú fɔ apó ayi álá afɔ́ wɔ, yé muú fɔ ntó apɔ́ ayi álá nógé wɔ néndé, wɔ mbií ne ɔlu muú ukpea. Bɔ́ malɔ́ mme meko ánogé wɔ néndé yéndémuú agé nnó depó etye etire wɔ ɔpye délu cho.”

⁵ Bɔ́ bina anerege mankwa ekwɔ ewéna, nké mpélé echa upɛ Esɔwɔ né mfaánebuú enené nge maá getoge ukpea Esɔwɔ né mmu.

⁶ Makiénné Esɔwɔ akénéama ayi agbaré ufɔ́ efwyale ukénéama átané né mmu echa upɛ Esɔwɔ ewémbɔ. Afye mandée pópó ayi ágenegé, ne yéndémuú bwɔ́ áni gebagé ndeé genɔ́ ji né ewome.

Uba mandeé bimbɔ́ ugenegé eké gul. ⁷ Ne menya ama né geluage menya eyi elú mebe eni, achyéé makiénné Esɔwɔ ayina akénéama ukú ukénéama, ebi akwye ne gul, ukú ebimbɔ́ ugbeé ne metɔ́ usɔ́ Esɔwɔ muú alu mebe te kwyakwya ne kwyakwya.

⁸ Ne amuawe ayi alerege nge ne utoó Esɔwɔ, agbeé né mmu echa upɛ Esɔwɔ ewémbɔ. Ne yé muú akágé kpé fɔ́ né mmu echa ewémbɔ, kpaá té ufɔ́ efwyale ebi makiénné Esɔwɔ yimbɔ́ achwɔ́ ne ubi ekogé.

16

Kwyakwya ufɔ́ efwyale ukénéama ebi Esɔwɔ achyegé

¹ Ne nwú meko muú fɔ́ né mmu echa upɛ Esɔwɔ ewémbɔ ndere ajɔ́ kenké ne makiénné yimbɔ́ akénéama aké, “Chóge dégbɛ genó eyi gelú né mmu ukú ebimbɔ́ ukenéama ebi ugbeé ne metɔ́ usɔ́ Esɔwɔ né mme.”

² Ajógé mbɔ́ ekiénné Esɔwɔ ewé mbɛ ejye gbɛ genó eyi gelu né mmu gekú jí fa mme. Egbegé mbɔ́, ubobo dekpa etire denome ne démyéé deshulé né

mmye bọ́ abi áwyaá geloge menya mebo ne ánógé meló uka wuú.

³ Ne ekiénné Ẹsọwọ ewé epyeé makiénné apea ejye gbẹ genó eyi gelu né mmu geku jíí né ebéé mega, ebwólé ẹla eké manoó genkwógé muú. Ne yéndégenó eyigé gelú né mmu ebéé mega gegbo.

⁴ Ne ekiénné ewé epyeé makiénné áléé, ejye gbẹ genó eyi gélú né mmu ejíí gekú né mabéé ne ambu nnyi, manaá mako mabwólé mala manoó manoó.

⁵ Epyegé mbọ, nwú ndere ekiénné Ẹsọwọ ewé ebọ́ mannyi mako ejọ́ eké, “Eeh wọ muú ukpea. Wọ muú ọlu ne ọbọ ọlú, mpa wye yi ọsọ́ alú cho.

⁶ Néndé bọ́ áwá nya bọ́ ukpea ne bọ́ ekpave bye, wọ ọchye ebwó manoó nnó ányú. Abó mbọ lé nsa mbaá genó eyigé ebwó ápyeé.” ⁷ Ajógé mbọ, nwú meko muú fọ ndere atane né geluógé upẹ Ẹsọwọ ajógé aké, “Ata Ẹsọwọ wọ Muú Ọpwoó amu, mpa wye ayi ọsọ́ alú cho, ne wáwálé.”

⁸ Ne ekiénné Ẹsọwọ ewé epyeé makiénné ani, egbẹ genó eyi gelú né mmu ejíí gekú né ñmẹé, ẹlyáá nnó ñmẹé edo bọ́ awú gekpọ́sógé ubalé eké ebi mewẹ. ⁹ Ubalé bina upyeé bọ́ álwerege Ẹsọwọ muú ẹfwyale ewéna elú jí né amu, yémbọ ákwọ́ré fọ matọ́ ebwó alyáá gabo ayi ebwó apye, áfegé Ẹsọwọ wó.

¹⁰ Ne ekiénné Ẹsọwọ ewé epyeé makiénné ata, egbẹ genó eyi gelú né mmu geku jíí né mfaá geluoge gefwage menya mebo yimbọ. Egbegé mbọ, mbaá ayi menya mebo yimbọ ágbáregé gefwa jíí wye ala gemuagemua. Ne akwaá ányeé manomé gétúgé ubalé ebi ebwó áwuú. ¹¹ Alwéré Ẹsọwọ muú alu né mfaánebuú gétúgé ubale ebi ebwó áwuú, ne upa

ebi ebwó áwya né mmye. Yémbò ákwòre fò matóó bwo ályaá gabo ayi ebwó ábó ápyeé wó.

¹² Ne ekiénné ewé epyeé makiénné akéné, egbe genó eyi gelú né mmu geku jíí né ebeé kpaá ewé ákuú nnó Yufretis. Egbegé mbò, ebeé ewémbò ewa meko, mampye nnó afwa abi atane né egbe ewé ñmèé etanege agé meti ákoó. ¹³ Epyegé mbò, ngé ubobo mandoó nchye áléé ayi álu eké bò mantwèrè átané né meno mmyò yimbò ne meno menya mebo ne meno muú ekpávé ayi gebyò. ¹⁴ Mandóo yina elé aló nchye abi ápye ufélekpa. Ajye bané afwa mme meko nnó ánywére ebwó mbaá ama ákpomé mmye mamye bee né gekpékpégé bií ebi Èsòwò Muú Apwóó amu achwóó.

¹⁵ “Wúgé, me nchwóó nyè eta nyú ndere menjo achwóó né gébé eyigé muú ala akaágé. Galógáló alú ne muú ayi abeé peé, abelege mandeé jíí chanchá nnó ekáge ji ake gejogéné akpa mekpo unóó.”

¹⁶ Ne mandoó nchye yimbò, anywèrè afwa mme ako né melu ema. Ákuú melu ewémbò né mejóó bóó Hibru nnó Amagedòn.

¹⁷ Ne ekiénné Èsòwò ewé egbeé makiénné akénéama, egbe genó eyi gelú né mmu geku jíí né mmu gejulé. Egbegé mbò nwú meko muú fò ndere atane né mmu gepúgé Èsòwò mbaá ayi geluoge gefwage Èsòwò gelu. Ajóó aké, “Nneré yéndégenó.”

¹⁸ Ajógémbò, gasama ake mamamama, mbaá awyale wyòwyò, mamfeé ányá gbanḡbanḡ ne mme anyigé ne eshye. Gefóó eyigé ákwaá alá álu danḡgé té mme alóó. ¹⁹ Mme anyigé mbò, melò kpaá ekaré né malu áléé, ne malò kpakpa né mme meko akwe. Ne Èsòwò ate gabo ayi Babilòn ápyeé, ápye

ji anyú mmɔ́ ami malu né mmu ηkɔ wuú. Mmɔ́ amibɔ matene né metɔ́ usɔ́ Ɛsɔwɔ. ²⁰ Yéndé melɔ metɔ́ nnyi ne makwe kpakpa áseé. ²¹ Ne ukpékpe makankoma ayi gema genɔ́ eké usaá bɔ pɔη uta atané mfaá ákwe bɔ́ né mmye. Bɔ́ álweré Ɛsɔwɔ gétúgέ ubale makankoma ebi ebwɔ́ áwu néndé, ubale bina uja dɔ́. *

17

Gekpékpegé mendée eno

¹ Ne ekiénné Ɛsɔwɔ ema né geluage makiénné akénéama ewé egbaré ukú ukénéama echwɔ́ jɔ́ ne me eké, “Chwɔ́ me nlerage nyε wɔ efwyale ewé Ɛsɔwɔ achyεge nyε gekpékpegé mendée eno muú ajwɔlé né gejamégé mannyi. ² Afwa mme ana manane tametame ne ji. Ne manane ayi ji anané tametame achalé bɔ́ mme ako eké élé mmɔ́ ne ji achyεé ebwɔ́ anyuú mapyεne ebwɔ́.”

³ Ne Mendoó Ukpea echwɔ́ me mmye ne ekiénné Ɛsɔwɔ ewémbɔ́ ékpá me mfé né mashwɔne. Njyεge ewú, ngé mendée fɔ́ ndere ajwɔlé né mfaá menya mebo fɔ́. Menya yimbɔ́ alú megelemegεle, awyaá makpo akénéama ne ambya afya. Asa gejamégé mabɔ́ wyεé amí machɔ́ mabɔ́ Ɛsɔwɔ né menyammye wuú meko. ⁴ Mendée yimbɔ́ afyε mandée magεle ne mandée gefwa, akwyεé menyammye wuú ne unó densɔ́ ebi akwyεé ne gul. Mataá ηka ne unó ebifɔ́ ebi ujame ηka dɔ́. Akuú ubi nnó pεls. Agbaré amo ayi akwyε ne gul. Amo yimbɔ́ agbeé ne uboboo unó bi utene mbaá manane tametame jí. ⁵ Asá mabɔ́ né népwe níí

* **16:21** Elú wáwálé nnó: Bɔ́ pɔη bina anɔ́ wyε eké uba simen upea.

ami matene né genó gefo eyigé bọ́ alá ákaágé garé. Asá wye áké, “Gekpékpégé Babilon, mma andée eno ako, ne muú ayi ubobo unó bi upyée fa mme utanege ji né amu.” ⁶ Ne ngé nnó manoó bọ́ Eṣowọ ne bọ́ abi bọ́ áwáne gétúgέ άpyée genó eyi Jisṣ akẹlege mampye mandée yimbọ eké mmọ́.

Ngégé nla meno mekpo fuú. ⁷ Yémbọ ekiénné Eṣowọ eké, “Ulannó wọ ọlaá meno mekpo fuú?” “Ngarége nyε wọ genó eyigé muú alá ákagé garé eyi getome ne mendée yina ne menya mebo makpo akénéama ne ambya afya ayi akpane ji ákéne. ⁸ Menya mebo ayi ọbọ ọgené mbọ, abó alú nya mebe, yémbọ apó sé mebe. Atanege nyε né mmu gepyée eyi geláge pọ ne kwyakwya akwó ewé. Ne aje nyε né mbaá ayi awáne nyε ji. Ne bọ́ abi álú fa mme, abi te ula ulọ́ mme Eṣowọ alá asá fọ́ mabọ bwó né mmu ηwe ayi ásame mabọ bọ́ abi ábọ́ nyε genwá eyi geláge byé wọ ágege menya yimbọ alá nyε mano mekpo fuú, néndé menya yimbọ abó alú nya mebe ne nana apósé yémbọ amágé chwó nyε.

⁹ “Mechọ ewéna ekẹlege bọ́ ábé ne denja. Makpo menya yimbọ akénéama áténe mbaá makwe akénéama ayi mendée yimbọ ajwólé wye.

¹⁰ Makpo yimbọ ntó akénéama áténe mbaá afwa akénéama. Né geluage afwa bimbọ, ata agbo me, ama alú né gefwa nana, ama ayi alaá alú danchwó. Achwógé ágbárege nyε gefwa jíí né mboó gébé.

¹¹ Ne menya mebo yimbọ ayi ábó alú nya mebe, ne nana alá apó sé, agbeé mfwa ayi agbeé afwa aneé. Ne ji alú mfwa ama né geluage afwa bimbọ akénéama. Ne aje nyε né mbaá ayi awane nyε ji.

¹² “Ambya yimbọ áfya ayi wọ ọgéne mbọ áténe mbaá afwa áfya abi alá alú danse uto mamgbaré

gefwa, yémbó áchyege nye ebwó ne menya mebo uto mamgbaré gefwa né nchwa neke ama. ¹³ Afwa bina áfya, ákamege nye meko ama, áchyéé eshye ne uto gefwagé bwó mbaá menya mebo yimbó. ¹⁴ Ebwó áhmeé nye ummye né Maá egòhme. Yémbó, Maá egòhme ne aḡkwálé bií abi ápyéé genó eyi ji akélege, ebwó abi Esòwò akuú ne ajya ammye nye ápwò ebwó néndé ji alú mfwa ayi abóó afwa ako ne Ata ayi abóó bò Ata ako.”

¹⁵ Ne ekiénné Esòwò ema ejóó ne me eké, “Man-nyi ayi wò ògene mbó, ayi mendée eno yimbó ajwólége wyéé aténe mbaá njune bóó, ufóó ufóó bóó, maló mme meko, ne ufóó ufóó mejóó. ¹⁶ Menya mebo yimbó ne ambya afya ayi wò ògéne mbó, áji ne menya yimbó jimbó ápaá nye mendée eno yimbó. Afóge nye yéndégenó eyigé ji awyaá, ályaá ji gejógené. Afyéé nyé menyammye wuú ne áso ji ne mewé. ¹⁷ Néndé Esòwò ne áfyéé mechó ewéna né matóó afwa bina nnó ákamé meko ama, achyéé utoó gefwage bwó mbaá menya mebo yimbó, nnó apye ndere ji Esòwò akélege kpaá té yéndégenó eyigé ji Esòwò ajóó gepyéé wáwálé.

¹⁸ “Mendée ayi ògéné mbó, aténe mbaá melo kpaá ewé ewyaá mfwa ayi abóó afwa maló mme mako.”

18

Melo Babilon ekwe

¹ Unó bina ukogé, ngé ekiénné ewé fò ndere etané né mfaánebuú éshulé fa me. Ewya gekpékpé uto ne genbó eyi getane ji mmye gepye mme meko agéne. ² Ne ejóó kenké eké, “Gekpékpégé melo Babilon ekwé burup, ela lé melú ujwólé aló nchye ne mbaá ayi

mandoó nchyeé ne denwyone debodebo ne etiré bɔ́ó alá akií débigé wyéé. ³ Néndé manane ayi ji ánáne tametame achalé mme meko eké elé mmáó ne ji achye ebwó anyú mapyene ebwó. Afwa mme ábelé ntó ne ji ne bɔ́ó abi akene gesé fa mme ákwe gefwa gétúgé geṅge manane tametame jíí.”

⁴ Ne nwú ntó meko ayi fɔ́ ndere atane né mfaánebuú. Aké, “Bɔ́ó ba, tanege délyaá ji ékágé dékpe mbwa ne gabo wuú, ne nnó ékágé dékpe ntó né efwyale ewé ji agene nyé. ⁵ Gabo ayi ji apyéé mbogé ákwigé jí né nchwe akwonege né mfaánebuú. Ne Esɔ́wɔ́ ate gabo wuú. ⁶ Pyegé ne ji wyé ndere ji ápyéé ne enyú. Genó eyigé ji apyéé ne enyú shuge ji amu manáne ápeá. Fyegé mmáó né mmu amo magbeé, déchwaré mami matoó mapwɔ́ ami ji áchwaré achyéé bɔ́ó anyuú, déchyéé ji anyú mami. ⁷ Ne pyegé ji ágé efwyale ne ali wyé ndere ji áfegé gemé jíí, ányéé apoge né mmu gabo. Ji adoó ebwɔ́ ewome ajógé aké, ‘Me mfwa mendée mpó fɔ́ mekwí ne mbéé fɔ́ ne mesome kánka’. ⁸ Ne gétú eyigémbɔ́, efwyale éshúlege nyé ji mmyé né bíí uma ne mameé, mesome, ne emímí mesa. Ne asóó nyé ji né mewé néndé Ata Esɔ́wɔ́ ese muú asóó mpa wuú, aṅea apwɔ́ amu.”

⁹ Afwa mme abi ábelé ne ji, ebwó abi ákpené mbwa ne ji ányéé né mmu gabo apoge ágegé nyé amuawe ayi atanegé né mewé ewé esóó jí, álilí nyé alá ne mesome. ¹⁰ Ebwó átene tete gétúgé áfɔ́ó nnó ákpené nyé né efwyale ne melɔ́ Babilɔ́n, ájelege mmyé ajógé aké, “Ebɔ́ ne wɔ́ nnó, Babilɔ́n gekpekgé melɔ́ ne melɔ́ ewé eṅea gemé, efwyale éshulé wɔ́ mmyé né nchwaneké ama.”

11 Bɔ́ɔ abi ákɛne gese fa mme álilí nyɛ alá ne mesome néndé yé muú ayi áname unó gesege bwó ápɔ́ sé. 12 Yé muú apó sé ayi áname unó bi ɛbwó ákpóó. Unó bina élé gul ne seleba, mataá malómáló ne unó bi ujame ɲka dɔ́ɔ ákuú ubi nnó pɛls, ɛshyɛ́ɛ ndeé, ndeé afwa, ndeé megele ne gefɔ́gɛ́ ndeé ɲka ɛyi ákuú ɛji nnó silk ne unó bi akwyɛ́ɛ ne ambya meshuú, unó bi ákwyɛ ne ufɔ́ɔ ufɔ́ɔ unɔ́ɔ ɛbi ugɔ́ɔ gebe unó bi ákwyɛ ne afyaákó, gese, ne gefɔ́gɛ́ ntaá ɛniné ákuú nnó mabel. 13 Unó ɛbifɔ́ ntó ɛbi alá name sé élé maweé ɲka ami manome gebe gelógéló, baá unɔ́ɔ abi ápyɛ menyɛ́ɛ agɔ́ɔ ákuú abi nnó sinamum mɛ́ɛry, insent, ne frankinsent. Mmɔ́ɔ grɛp, maweé ne menyɛ́ɛ nkane: flawa melóméló ayi apyɛ brɛd ne mbeé gefɔ́gɛ́ nchi ɛyigé ákuú nnó whit. Ne utu nkane: mpɔ́, magɔ́ɲme, mpɔ́ mekagala, mboó gese uka úpeá ayi mpɔ́ mekagala ɛjame ne ákwaá abi ákpóó nkane afwɛ. Yé muú apó sé ayi aname unó bina uko. 14 Bɔ́ɔ abi ákɛne gese ájógɛ́ nyɛ ne ji áké, “Unó ulúúló uko ɛbi wɔ́ ɔ́kelege nnó ube ɛbyɛ́ɛ upó se. Ne unó uko ɛbi upyɛ́ɛ nnó wɔ́ ɔ́be gbɛne ɛbi upyɛ ntó nnó wɔ́ ɔ́kwɔ́ ɲgɔ́ ɔ́máge gé sé ubi.” 15 Ne ɛbwó bimbɔ́ abi abɔ́ɔ gefwa gétúgɛ́ ákɛne gese ne ji áténégɛ́ nyɛ tété ne ɛfɔ́ɔ nnó ákpɛne nyɛ né ɛfwyale ne ji, álilí kenké ne mesome, 16 ájógɛ́ áké, “Ebó nnó, ɛbó nnó ne Babilɔ́n melo kpaá. Babilɔ́n alú nyá ɛké mendée ayi abɔ́ afyɛ́ɛ mashyɛ́ɛ ndeé, mandeé magele, ne mandeé gefwa. Akwyɛ́ɛ menyammyɛ wuú ne unó desɔ́ ɛbi akwyɛ ne gul, mataá malómáló ne unó bi ujame ɲka dɔ́ɔ ákuú nnó pɛls. 17 Né nchwa neke ama gefwa jí geko geno.”

Bɔ́ɔ ákpakpa abi áɲɛá gɛmɛ né masogéka ne bɔ́ɔ

abi ákɛné wye, abi ápye utóó né mmu, ne abi ákɛne gese né mmu, átenege nye tété, ¹⁸ ákálege gétúgɛ ágɛné amuawe ayi atanege né mewɛ ewé asóó ji, ájelege mmye áké, “Cha oo, ndé melo ewé ekwɔne gekpékpé melo ewé.” ¹⁹ Ne áchwɛ matwɔ ágbɛ né makpo bwó, álilé nye ála ne mesome metóó ájógɛ áké, “Ebo nnó, ebo nnó, ne melo kpaá, melo ewéna ne ebo elú meló ewé bóó ako abi awyaá masogéka né ebéé mega ákwene gefwa wyeé gétúgɛ gefwa eyigé ji awyaá. Yémbɔ né nchwanekɛ ama, yéndégenó eyigé ji awyaá génó.”

²⁰ Enyú ako abi délú né mfaánebuú begé ne nechóchó néndé Eɔwɔ achɔ melo Babilɔn. Ne enyú bóó Eɔwɔ, áhgbá Kras ne bóó ekpávɛ Eɔwɔ begé ntó ne nechóchó néndé Eɔwɔ asóó mɛ mpa wuú gétúgɛ gabo ayi ji apyɛé eta nyú.

²¹ Ajógɛ mbɔ, gekpékpé gɛ ekiénné Eɔwɔ fɔ ebwɛé ntaá eniné nelú eké gekpékpé gɛ ntaá eniné ákwóó unó efome né mmu ebéé mega jegemmm ejóó eké, “Wye ndere ntaá eniné na nékwene ne eshyɛ nechogeré, mbɔntó ne áfómege nye melo Babilɔn ne eshyɛ, áchɔ ewu. Ndere elúmbɔ bóó ámágɛ gé nye se ewú. ²² Ne ámágɛ wú sé meko nɛhke ení ákwele, makwa ayi akwané, ambya ayi áfómege ne mbá né melo Babilɔn. Ne yé muú deshweé ama ayi amágɛ be wyeé ápó. Ne amágɛ wú nye sé ndere muú akwóó nchi né ntaá. ²³ Ne yé bíí uma ntó geɛgbógɛ etúlékáɛ gegénege sé wyeé. Yé epaá neba muú áwuú sé wyeé. Bóó bíí abi ákɛne gese ne abɔ álu bóó abi áhɛa gemɛ fa mme yina, ne bóó megyaá bíí abwólé maló mme mako ne depɔré megyaá bwó.”

24 Kwyakwya alu nnó Babilɔn áwá bɔ́ ɛkpávɛ bíí ne bɔ́ abifɔ́ ako abi álu bɔ́ Ɛsɔwɔ. Ne manoó bɔ́ bina malu ji mmyɛ chónchó ne ami bɔ́ ako abi áwáné né mme meko, ne Ɛsɔwɔ achɔ melɔ ɛwéna gétúgɛ gabɔ ɛwu.

19

1 Unó bina upyɛgɛ mbɔ, nwú gewyagɛ meko ɛké, meko gejamégɛ bɔ́ né mfaánebuú. Akálege kenké áké, “Défɛé Ɛsɔwɔ, ji ne aferege bɔ́ né ɛfwyale gabɔ. Ji ne abɔ́ ɲgɔ ne uto ukó. 2 Mpa wuú alú cho ne wáwálé. Ji afyɛ gekpékpégɛ mendée eno yina né ɛfwyale. Mendée yina ne achɔ́ bɔ́ mme ne manáné tametame. Ɛsɔwɔ afyɛ ji né ɛfwyale gétúgɛ manoó bɔ́ utɔ́ bíí abi ji áwáné.” 3 Ama kalé kenké áké, “Défɛé Ɛsɔwɔ, amuawɛ ayi átánege né mewɛ ɛwé ɛsɔ́ ji ákwɔme ájyɛé mfaá té kwyakwya ne kwyakwya.” 4 Akálégɛ mbɔ, ákpakpa bimɔ esaá meso ɛni ne menya ɛyimɔ meɛ ɛni, ákwe uwya mme ánógɛ Ɛsɔwɔ muú ajwólé né mfaá geluɔgɛ gefwa áké, “Amɛn défɛé Ɛsɔwɔ.”

Apyɛ epaá nebane Maá ɛgɔɲme

5 Né meko muú fɔ, atané né geluɔge gefwagɛ Ɛsɔwɔ ajógɛ aké, “Fégɛ Ɛsɔwɔ se ɛnyú ako abi délú baá defwɛ bíí ne dénógɛ ji abi áɲea gemɛ ne abi álá áɲea gemɛ wó.” 6 Ajɔógɛ mbɔ, nwú meko fɔ ɛké meko gejamégɛ bɔ́. Alu ɛké gewyagɛ makɔné nnyi ne ɛké meko gekpɛkpɛge néfe. Akálege áké, “Défɛé Ata Ɛsɔwɔ se Muú Apwɔ́ amu, ji alú mfwa. 7 Ɛse ako débɛ ne nechóchɔ, débenege ji mabɔ ne déchyɛge ji ɲgɔ, néndé bíí epaá nebane Maá ɛgɔɲme ukwóné ne Mendée neba wuú akpome mé

mmye ágilɛ ji. ⁸ Achyɛ́ Mendée neba Maá egɔɔme eshyɛ́ ndeé nnó afyɛ. Mandeé yimbɔ́ ágenegɛ manemane, ne (átene mbaá ulɔ́ melú ebi bɔ́ ɛsɔwɔ́ álerege).”

⁹ Ne ekiénné ɛsɔwɔ́ ewémbɔ́, ema ejɔ́ genó eyigé fɔ́ ne me eké, “Metɔ́ megɔ́megɔ́ ebe ne bɔ́ abi álɔ́ ebwɔ́ nnó áchwɔ́ ányé epaá neba ne Maá egɔɔme.” Ne ema ejɔ́ genó eyigé fɔ́ eké, “Mekómejɔ́ eyina etane mbaá ɛsɔwɔ́ jimbɔ́.”

¹⁰ Nwúge mbɔ́, nkwe ewu uka nnó nnógé ewú, yémbɔ́ ejɔ́ eké, “Ɔpyegé fɔ́ mbɔ́, mentó nlú lé maá utɔ́ ɛsɔwɔ́ wye ndere wɔ́ ne ate aɔme byéé abi álú bɔ́ ɛsɔwɔ́ abi ákwɔ́legé wáwálé ayi Jisɔs aleré né genó eyi ji agaré. Nógé élé ɛsɔwɔ́ néndé élé wáwálé ayi Jisɔs aleré né genó eyi ji agaré ne achyɛ́ bɔ́ ekpávɛ́ ɛsɔwɔ́ mekomejɔ́ ayi ebwɔ́ ágarége.”

Kras ammye apwɔ́ menya mebo

¹¹ Nge ndere mfaánebuú alu fuú, nké mpélé nge mpɔ́ mekagala pópó. Muú ayi ajwɔ́lé né mfaá akamege nnó, muú ayi dékágé neré metɔ́ ne ji, ji ayi apyɛ́ bɔ́ ákagé wáwálé ayi atome ne ɛsɔwɔ́. Asélé mati ayi alú cho mansɔ́ mpa ne ammye umye ne bɔ́ abi alá akií fɔ́ ji. ¹² Amɛ ji agenege eké nenɔ́me mewɛ. Akwere gejamégé délaré gefwa né mekpɔ́ wuú. Asá mabo né menyammye wuú ami yé muú alá ákágé ekósé wye jimbɔ́. ¹³ Awya nku ayi áfyɛ né mmu manoó ne mabo mií makamege nnó, “Mekomejɔ́ ɛsɔwɔ́.” ¹⁴ Ne bɔ́ bee abi álú né mfaánebuú áfyɛ mandeé pópó, ayi akpeage, ákwyyé áji ne eshyɛ́ ndeé. Ajwɔ́lé né mfaá mpɔ́ mekagala eyi elú pópó ákwɔ́lege ji. ¹⁵ Aparanja ayi achyaá atane ji né meno. Asele nyɛ élé aparanja

yina ne ammye ne bɔ́ malɔ mme meko apwɔ ɛbwɔ́. Agbarege nye ɛbwɔ́ ne amu matomato, Ne aɲamege nye manaá umpomé né mmu ejya mmi nnó áɲame manaá matane wyeé, ne ejya ewéna ɛtene mbaá metɔ́ usɔ́ ɛsɔwɔ́ Muú Apwɔ́ amu. ¹⁶ Asa mabɔ́ né ndeé eyi elú ji mmye ne melú ewé ekweré ena geka wuú áké, “Mfwa ayi abɔ́ afwa ako ne Ata ayi abɔ́ bɔ́ Ata ako.”

¹⁷ Ne ngé ekiénné ɛsɔwɔ́ fɔ́ ndere ɛtene né mfaá ñme, ekú kenké eké denwɔ́né déko ɛti délyenege té mfaá ufɔ́ ufɔ́ denwɔ́ne ɛtiré dényé uɲkwɔ́ unó “Chwóge dénywere mbaá ama, dénye gekpékpé gé epaá ewé ɛsɔwɔ́ ágbarege nye. ¹⁸ Chwóge dényé uɲkwɔ́ afwa, ákpakpa bɔ́ bee ne bɔ́ bee, mpɔ́ mekagala ne bɔ́ abi ákene né mfaá ɛji. Chwóge dénye uɲkwɔ́ bɔ́ ako, afwe ne abi alá ápó afwe, ne bɔ́ abi aɲea geme ne abi alá aɲea geme wɔ́.”

¹⁹ ɛjógé mbɔ́, ngé menya mebo ayi atane né mmu ɛbéé mega, ne afwa mme ako ne bɔ́ bee bwɔ́ ánywere mbaá ama nnó ammye bee ne muú ayi ákene mfaá mpɔ́ mekagala yimbɔ́ pópó ne bɔ́ bee abi. ²⁰ Yémbɔ́ ápye menya mebo yimbɔ́ chónchó ne muú ekpávé gebyɔ́, ji ayi apyé ufelekpa né mbe ushu menya mebo yimbɔ́. Ufélekpa bina ne ji aselé abwólé bɔ́ abi awyaá gelogé menya mebo yimbɔ́ ne ánógé meló uka wuú. Ne áfome menya mebo yimbɔ́ ne muú ekpávé gebyɔ́ né mmu gepyege mewé ewé elúlé ne genó eyi ákuú nnó sɔ́lfɔ́. ²¹ Ne muú ayi ajwólé mfaá mpɔ́ mekagala ayi pópó, ase aparanja ayi atane né meno wuú awá bɔ́ abi álaá, denywɔ́ne déko, dényé menya uɲkwɔ́ bɔ́ bimɔ́ kaka dépwa.

20

Afyε danchomeló deno aηme dεle

¹ Ne ngé ekiénné Eσωω ndere etane né mfaánebuú εshulege mme. Egbaré né εbwω wuú agbωgωlo gepyεé eyi geláge pó ne kwyakwya ne gekpekpege mkpókávé. ²⁻³ Ekiénné εwémbo, εpye gekwenege mmyω ayi ákuú ji nnó dragon ji ne ákuú nnó danchomeló ne satan εwe ji, εbwεé εfome né mmu gepyεé eyigémbo, εgbe meno gepyε eyigémbo εdyε εwu. Danchomeló álá né mmu né aηme dεle. Apye mbω nnó ji agegé sé meti εwé ji abwólége bωó mme. Ne dεle aηme yina akógé, abóó manlyaá ji né maá mboó gébé.

⁴ Ne nké mmágé pé, ngé uluω gefwa, ne bωó abi ajwólé wyε. Bωó bina elé abi Eσωω achyεé εbwó εbwōnyε nnó ágbárege gefwa. Ne ngé ntó mandoó bωó abi áwáné εbwó gétúgé ágaregé wáwálé ayi Jisωs aléré né genó eyi ji agaré ne mekomejωó Eσωω. Bωó bina ne álú bωó abi álá nógé fó menya mebo yimbo yé εbé lé meló uka wuú. Ne yé geloge menya yimbo εbwó ákáme fó nnó ása geji né mampwε bwó yé né amu bwó wó. Eσωó apyε εbwó ákwilé né negbo ágbaré gefwa ne Kras né aηme dεle. ⁵ Gé ndo mbe ayi Eσωω apyεé bωó akwilé né negbo na. (Ne bωó abifo ntó abi ágbóo, Eσωω apyε fó εbwó ákwilé né negbo wó, kpaá té dεle aηme yina ábyeé.) ⁶ Metó megomεgō εbe ne bωó abi Eσωω ajyaá, εbwó abi ji apyε nyε ákwilé né negbo né ndo ayi mbe, ayi ji apyεé nyε bωó ákwilé né negbo. Eσωω ajya εbwó nnó ábé bωó bií ne εbwó ágboó fó negbone ndo εpeá. Abéé nyε elé ampyεé upε mbaá Eσωω ne Kras, ne εbwó ágbárege nyε gefwa ne ji né aηme dεle.

Ɛsɔwɔ apwɔ danchɔmeló

⁷ Ne aɲme dele ayina akoóge, Ɛsɔwɔ aferege nyɛ danchɔmeló né denɔ ɛtiré abɔ afyɛé ji. ⁸ Atanege, akɛné nyɛ abwɔlege bɔ́ɔ né malɔ mme meko. Akuú umɛ malɔ áyina nnó Gɔg ne Magɔk. Danchɔmeló anywerege nyɛ ɛbwó ako né mbaá ama, nnó ammyɛ bee. Ne bɔ́ɔ abi ámmɛ nyɛ ummyɛ bina ájame nyɛ ɛké gesɔ́ge mbale nnyi. ⁹ Atanege nyɛ né malɔ mme meko, anɔ mbaá ayi bɔ́ɔ Ɛsɔwɔ ánywere. Mbaá yimbɔ élé melɔ kpaa ɛwé Ɛsɔwɔ agboó ne ɛwú. Anɔ́ge melɔ ɛwémbɔ mme, mewɛ ɛtanege nyɛ né mfaánebuú ɛlwe ɛbwó ako á́sɔ́. ¹⁰ Ne afomege nyɛ danchɔmeló muú abwólé ɛbwó né mmu gepyɛgé mewɛ ɛwé ɛlúlé ne genó ɛyigé ákuú nnó sɔ́fɔ́. Mbaá yina ne abó áfome menya mebo ne muú ɛkpávɛ ayi gebyɔ́. Ne ɛbwó áwuú nyɛ ubale wyɛ utuú ne ɲwɔmese tɛ kwyakwya tɛ kwyakwya.

Ɛsɔwɔ asɔ kwyakwya mpa

¹¹ Ne ngé gekpékpé́ge geluɔ́ge gefwa ɛyi gélú pópó ne muú ayi ajwólé mfaá. Ne mfaánebuú ne mme áseé né mbɛ ushu wuú yé muú agé sé ɛbwó wó. ¹² Ne ngé ntó bɔ́ɔ ako abi ábɔ ágboó, abi áɲea gɛmɛ ne abi álá ɲea gɛmɛ wɔ. Ɛbwó ako atɛné né mbɛ geluɔ́ge gefwa ɛyigémbɔ. Ne anene bɔ ɲwe, anene nto ɲwe ayifɔ́ ayi awyaá mabɔ bɔ́ɔ abi ábɔ́ɔ nyɛ geɲwá ɛyi gélá́ge byé. Ne muú ayi ajwólé, akwólé dépɔ́ ɛtiré bɔ́ɔ bina ábɔ́ ápyɛé ndere á́sámé né mmu bɔ ɲwe, asɔ mpa bwó. ¹³ Ne ɛbɛé mega ɛlyaá bɔ́ɔ abi abɔ́ ánómé wyɛ átané átené ne geluɔ́ge gefwa. Wyɛmbɔ ntó ne negbo ne melɔ áwuú bɔ́ɔ, ályaá áwuú bɔ́ɔ átané átené né geluɔ́

gefwa eyigembɔ. Ne muú ayi ajwɔlé mfaá geluɔgé gefwa akwɔle dépɔ etiré bwó ábɔ ápye, asɔ mpa bwó. ¹⁴ Apyegé mbɔ ákpa negbo ne melɔ áwuú bɔɔ aɲme né mmu gepyege mewε. (Gepyege mewε ewéna élé negbo né ndɔ epea.) ¹⁵ Ne yéndémuú ayi mabɔ amií malá pɔ né mmu ηwe ayi awyaá mabɔ bɔɔ abi abɔɔ nye genwá eyi gélágé byé afomege ji né mmu gepyege mewε.

21

Esɔwɔ akwyé mme ayi meke ne mfaánebuú ayi meke

¹ Epyegembɔ, ngé mfaánebuú ayi meke ne mme ayi meke. Mfaánebuú ayi mbe ne mme ayi mbe chónchó ne ebéé mega ápɔ sé. ² Ne ngé ntó melɔ ukpea ewé ákuú nnó Jerosale ayi meke ndere átane né mfaánebuú mbaá Esɔwɔ ashulege áchwɔɔ. Akwyéé ewú ndere mendée neba akwyegé menyammye agilé menɔ wuu. ³ Ne nwú meko muú fɔ, atane né geluɔgé gefwage Esɔwɔ ajógé kenké aké, “Nana Esɔwɔ achwɔ jwɔlé ne akwaá. Ji ajwɔlé nye ne ebwɔ, ne ebwɔ ntó ábéé nye bɔɔ bií. Esɔwɔ jimbɔɔ abéé nye ne ebwɔ ne abéé nye ntó Esɔwɔ bwó. ⁴ Ji atilé nye ebwɔ manse ako né ame. Negboɔ nebéé nye sé, ne bɔɔ abéé nye sé ne mesome, ebwɔ álili nye sé, ne yé ubalé áwuú nye sé néndé unó bi ukwene ukoó mé.” ⁵ Ne muú ayi ajwɔlé né mfaá geluɔge gefwa ajɔɔ aké, “Wúgé, nana mpye unó ukó ulaá uke.” Ne ama ajɔɔ ne me aké, “Sa unó bina mme néndé mekomejɔɔ eyina elú wáwálé, nerege metɔɔ nnó unó bi ájɔɔ upyéé nye.” ⁶ Ama ajɔɔ ne me aké, “Nnere yéndégenó, me ne nlú muú mbe ne ayi kwyakwya, unó uko

ulɔ́ ne me ne ukwyagɛ ne me. Ne yéndémuú ayi mmwɔ́lé manaá ɛpyɛ ji, nchyege ji manaá anyú ɛwé álá achyege fɔ́ ŋka. Manaá ami mbɔ matanege né embu nnyi ɛwé ɛwyaá manaá ami machyege geɲwá. ⁷ Ne yéndémuú ayi ammyɛ apwɔ́ gabo, me nchyege nyɛ ji unó bina. Me mbeé nyɛ ɛsɔwɔ́ wuú ne ji ntó abeé nyɛ maá wá. ⁸ Yémbɔ, bɔ́ abɪ áfɔ́ mampyege unó bi me nkɛlege, abɪ áshyá mamfyɛ metɔ́ ne me, abɪ áchɔ́ menyammyɛ bwɔ́ ne gabo, abɪ awané bɔ́, abɪ anane manané tametame, abɪ anyeé mafó, abɪ ánógé aló uka, ne bɔ́ akó abɪ ábyɔge gebyɔ́ ákpane nyɛ ɛbwɔ́ áfome mmú gepyɛge mewɛ ɛwé ɛlúlɛ ne genó ɛyi ákuú nnó sɔ́fɔ́. Gepyɛge mewɛ ɛwéna ɛlé negbone ndɔ́ ɛpea.”

Jɔn ama age melɔ́ Jerosale ɛwé meke

⁹ Ne ekiénné ɛsɔwɔ́ ɛma, né geluage makiénné ɛsɔwɔ́ akénéama ayi agbaré ukú ɛfwyale ukénéama ɛchwɔ́ ɛjɔ́ ne me ɛké, “Chwɔ́ me nɛrege nyɛ wɔ́ mendée neba, mendée ayi Maá ɛgɔɲme ábáne nyɛ.” ¹⁰ Mendoó Ukpea ɛchwɔ́ me mmyɛ ne ekiénné ɛsɔwɔ́ ɛwémbɔ́ ɛkpa me mfé né mfaá mekwɛ ɛwé ɛɲɔge dɔ́, ɛɛré me melɔ́ Jerosale ɛwé ɛlú melɔ́ ukpea ndɛre ɛtané mbaá ɛsɔwɔ́ né mfaánebuú ɛshulege mme. ¹¹ Geɲgbɔ́gé ɛsɔwɔ́ gegénege wyéé manémané, ne melɔ́ ɛwémbɔ́ ɛshwánege ntó ɛké mataá malómaló ayi ákuú nnó jasper. ɛgénege ɲanéɲané ɛké makankoma. ¹² Gebame ɛyi geɲɔ́gé genɔ́ melɔ́ ɛwémbɔ́ mme. Gebame ɛyigémbɔ́ gewya mano gebame áfyanéápeá. Né mano gebame yimbɔ́ makiénné ɛsɔwɔ́ áfyanéápeá áténé wyɛ ábáme. Né mano gebamé yimbɔ́ ntó ása mabɔ́ matoó bɔ́

Isrɛli áfyanéápeá wɔyé. ¹³ Mano gebamé yina, áléé álú né egbe ebwɔnye, áléé álú né egbe ebwɔbe, áléé álú mbe ne áléé álú meso. ¹⁴ Aténé gebamé eyigémbɔ né mfaá mabɔmé áfyanéápeá. Asa mabɔ áhgbá Maá egɔhɔme áfyanéápeá né mabɔmé yina. ¹⁵ Ne ekiénné Ɛsɔwɔ ewé ebɔ ejóggé mbɔ ne me, egbaré meto ewé amɛge unó wɔyé, akwɔyé ewú ne gul. Ɛlé meto ewémbɔ ne ewú ebɔ emɛgé melo kpaá ewémbɔ. Ɛmɛé makwɔó gebamé chónchó ne manombi. ¹⁶ Metyéé melo ewémbɔ ne unalé úlú wɔɛ janja. Ekiénné Ɛsɔwɔ ewémbɔ emɛé melo ewémbɔ ne meto ewé egbaré, metyéé melo ewémbɔ elú ñkpa neke dele ne geba. Wɔymbɔ ntó ne unalé ne unjógé melo ewémbɔ úlú. ¹⁷ Ekiénné Ɛsɔwɔ ewémbɔ, emɛé ntó unjoge gébamé eyigémbɔ, gelú matyéé amu usaá uléé meso ekéné ndere akwaá ámɛge unó. ¹⁸ Aténé gébamé eyigé na ne mataá malómáló ayi ákuú nnó jaspera. Ne yéndégenó né melo ewémbɔ ákwɔɛ geji ne gul. Gul yimbɔ ápó ne deba, ne agɛnege eké ɛféé. ¹⁹ Ne mabɔmé ayi átene gébame eyigémbɔ né mfaá, ákwɔyéé áji ne mataá ñka ufóufóó. Ntaá né mbe eniné aló manténe mabɔmé yimbɔ nékámege nnó jaspera, eníne gbeé mataá apea nékámege safaya, eníne negbeé áléé nékámege áget, eníne négbeé áni nékámege émérá. ²⁰ Ɛni négbeé mataá átá nékámege ɔni, ɛni négbeé akené nékámege kánelyan, ɛni négbeé akénéama nékámege krisolite, ɛni negbeé aneé nékámege berin, ɛni negbeé aneéneama nékámege tɔpas, ɛni negbeé afyaá nékámege krisopreis eníne negbeé afyaneama nékámege jacint, ne eníne negbeé áfyanéápeá nékámege

ametis. ²¹ Mano gébámé ayina áfyaneápeá ákwyéé áji ne mataá ñka áfyaneápeá ayi ákamege nnó pels, ne ákwyéé yéndé meno gébámé ne pel ama, ne ákwyéé metó melo ewémbó ne gul. Ayi alá pó ne deba, ne agéne eké efeé.

²² Ne ngé fó echa ure Esowó né melo ewémbó wó néndé, Ata Esowó jimbóó Muú Apwóó amu ne Maá egòñme ne álú echa ewémbó. ²³ Melo ewémbó ekelege sé nnó ñme yé ebe elé mfaá agénege wyéé néndé genjgboge Esowó ne gelú mewé ewé egénege wye ne etulekan wuú elé Maá egòñme. ²⁴ Bóó malo mme meko ákené nye né mmu genjgbó eyigémbó. Ne afwa mme achwóó nye ne ñgó bwó né melo ewémbó. ²⁵ Mano gebamé eyigé na, ábeé fuú yéndégébé, néndé utuú ugilé fó wyéé. ²⁶ Ne ebwó áchwóó nye ne ñgó ne énogé bóó malo mme meko né melo ewémbó. ²⁷ Yémbó, yéndégenó eyigé gélágé pó pópó né mbe ushu Esowó, gékpené fó né melo ewémbó, yé muú ayi apyéé depó debodebo yé ebe elé muú gebyó akpené fó wye. Ekosé bóó abi mabó bwó malu né mmu ñwe Maá egòñme ayi asamé mabó bóó abi abóó nye genjwá eyi gélágé byé ne ákpené wye.

22

Ebeé ewé ewyaá manaá ami machyge genjwá eyigé gélágé byé

¹ Ne ekiénné Esowó ewémbó, eléré me ntó ebeé ewé ewyaá manaá ami machyge genjwá eyi gélágé byé, magenege eké efeé meke. Ebeé ewémbó etanege né geluoge gefwage Esowó ne maá egòñme.

² Eshúlege ejyε né metó melo ewémbó. Né yéndé

εγβε εβεέ εwένα, unós ebi uchyege γεηwά úlú wye. Unós ebimbɔ uwame umpomé ndɔ εfyánεpeá né ημε. Ne yéndé mfaá uwomé ndɔ gama. Ne bya unós ebimbɔ úlú uka ebi ápye bós mameé né mme meko átoógé. ³ Ne yéndégenó eyigé Εσωwɔ áleré geji ukwekwe amu gebéé fɔ né melɔ εwémbo.

Ne geluoge gefwage Εσωwɔ né maá εgɔηme gebéé nye wye ne bós utós bíí ánógé nye ji. ⁴ Αγενé nye ushu Εσωwɔ, asamé nye ntó mabɔ míí né mampwe bwó. ⁵ Utuí ugilé fɔ né melɔ εwémbo. Ne bós abi álú wye ákelégé sé γεηbɔ etúlékáη ne ημεé néndé Ata Εσωwɔ ne abéé nye γεηgbógé εbwó. Ne εbwó ágbarége nye gefwa té kwyakwya ne kwyakwya.

Jisɔs aké ji amagé chwó nye fa mme

⁶ Ne ekiénné Εσωwɔ εwémbo ema εjós ne me eké, “Mekómejós eyina elú wáwálé kámege ne εji. Ata Εσωwɔ muú achyege mendoó mbaá bós ekpávε bíí atɔ ekiénné wuú nnó εchwó eléré baá utós bíí unó bi uchwó upyé.”

⁷ Ne Jisɔs aké, “Wúgé, εla gachyéé me nchwós. Metós megɔmegɔ εβε ne bós abi ápye unó bi ásamé né mmu ηwe yina ebi upye nye nana ne meso gébé.”

⁸ Me Jɔn nlú muú ayi nwuú, ne ngené unó bina uko. Nwúgé ne ngége unó bina nkwe uwya mme né mbe ushu ekiénné Εσωwɔ εwé eléré mbɔ me unó bina nnó me nógé εwú. ⁹ Yémbo εjós ne me eké, “Ōpyegé fɔ mbɔ, me ntó nlú élé muú utós Εσωwɔ wye ndere wɔ ne ate ηηme bye abi álú bós ekpávε Εσωwɔ ne abifɔ ako abi ábélege mekomejós ayi ásámé né ηwe yina. Nógé lé Εσωwɔ.” ¹⁰ Ema εjós eké, “Ōbigé fɔ mekomejós yina, ayi ásámé né mmu ηwe yina

ayi agarége unó bi upyéé nye nana né ebí upye nye meso gébé, néndé gébé eyigé unó bina upye nye gélá kwókwólé. ¹¹ Nɔere elúmbɔ, yéndémuú ayi ápyéé gabo, ápyegé wye gabo wuú. Ayi ápyéé ukwenkwe unó ápyegé wye ukwenkwe unó, ayi ápye genó eyi gélú cho ápyegé wye genó eyi gélú cho ne ayi álu pópó ábéé wye pópó.”

¹² Jisɔs ama ajó aké, “Gegé, ɛla gachyéé me nchwó. Nké nchwó, nchwó ne nsa ayi nchyege yéndémuú nɔere ji apye utó. ¹³ Me ne nlú genóge mbe ne eyigé kwyakwya, muú mbe ne ayi kwyakwya, unó uko uló ne me, ne ukwyage ne me.”

¹⁴ “Metó megámegá ebéé ne bóó abi áshwɔne mawulé bwó akpea pópó. Ebwó ne ɛsɔwɔ achyege nyé ebwɔnye nnó ákoó né meno gébamé ákre né melo ewémbɔ ányé umpomé genó eyigé gechege geɲwá eyi gélágé byé. ¹⁵ Bóó abi alá ákrene fɔ né melo ewémbɔ elé bóó abi álu eké bɔ mammye, bóó abi ányé mafoó abi ánane manané tametame, abi áwane bóó, abi ánógé aló uka, abi ábyɔge gebyɔ ne bóó débwólé.

¹⁶ “Ne me Jisɔs ntɔ ekiénné wa nnó echwó egaré enyú unó bina né machomele bóó ɛsɔwɔ. Me nlú mpyáne mfwa Devid, me nlú ntó eké membe ayi agenege né gejejegé bíí.”

¹⁷ Ajóógé mbɔ, Mendoó ɛsɔwɔ ne Mendée maá egɔɲme áké, “Chwó Ata Jisɔs.” Ne yéndémuú ayi awuú mekomejóó yina, abɔ manjóó ntó nnó “Chwó.” Ne yéndémuú ayi mmwólé manaá epyéé ji, achwó ne yéndémuú ayi akélege achwó anyú manaá ami machyege geɲwá ewé alá chyegé ɲka.

Kwyakwya mejóó

18 Ne me Jɔn nkwelege mbeé mbaá yéndemuú ayi áwuú mekomejɔ́ ayi asamé né mmu ηwe ayina. Mekomejɔ́ yina ayi agarege unó bi upyεé nye nana ne εbi upyε nye meso gébé nnó, “Muú ayi agbεge genó εyigé chá né unó bi ásamé né ηwe yina, Εσωω agbεgé nye ntó εfwyale wuú ne ufɔ́ mameé ukeneama εbi ásamé né ηwe yina. 19 Ne yéndemuú ayi aferege genó né unó bi ásamé né ηwe yina ayi agaré unó bi upyε nye nana ne εbi upyε nye meso gébé, Εσωω ntó aselé nye uto εbi abó achyεé ji nnó akpé ne melɔ ukpea εwémbɔ ányé umpomé genɔ́ εyi géchyége geηwá εyi gélagé byé, ndere asamé né ηwe yina.”

20 Ne muú ayi agarége unó bina aké, “Wáwálé εlá gachyεé me nchwɔ́.”

Jɔn aké, Amen, chwó Ata Jisɔs.

21 Nnenémmye nnó Ata Jisɔs álérégé bɔ́ Εσωω ako galógáló.

Ν_{WE} menomenyεέ mekέ
New Testament in Denya (CM:anv:Denya)

copyright © 2010 Wycliffe Bible Translators, Inc.

Language: Denya

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Denya

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022
c1c6a10b-c0b1-5242-bb46-153e2e25ddc7